

## **Sepinien xa diamu te Hibru**

*?Visi iaxa tetis uvei ak?*

Moletin tovuol wakil kuh visi iaxa tetis sepinien ak. E lakila xa moletin ak tehe Siu tei<sup>☆</sup> e tenapus ti Iesu ni meten xati mu e metuveen tova.<sup>☆</sup> Ma, tenave Pol ti iaxa tetisi. E moletin ak be vat tei te sias xa mikil kuh Vanuvei Eo. Rut moletin xil lanemi labit Banabas iaxa tetis uvei ak. Xil lanemi mak vengan xa xi tehe Siu tei xa tehe pris tei xa testal texo vatimol xa mahulong na Livae.<sup>☆</sup> Xi tehe vat tei te sias xa tekakao e tepol vituei tetel Pol huram xil holu.<sup>☆</sup>

E, xosali, moletin xil holu lake reitin en xa Apolos iaxa tetisi. Apolos tehe Siu tei te taon te hal Aleksandria xa tesukul kuhi e tekil kuh Vanuvei Eo na Hi. Xi tehe vat te sias xa mikila vasepin kuhi e vapispis kuhi ni mi moletin xil xa Hi tehosei Iesu mei tehe Mesaea nae.<sup>☆</sup> E tave ti neta xa ratakil kuh ti xa visi tetis uvei ak te Hibru, Kristin xil vus xa latevuli mei duxoh xosali lapus kila xa metisouen xa di en nggo visal Hi.

Moletin tovuol xa wakil kuh melele xati xa latetis sepinien ak. Lakila tang xa latetisi tetiamu ni huram 70 AD (huram xil xa tetutou ni melele xa Iesu tepot en) vengan xa, e melele nen ak, moletin te vaeen xil te kavmen te hal Rom latemei e latehu lelen taon te hal Serusalem e Nim Eo na Hi xa da en. E, e uvei te Hibru ak, moletin xa tetisi tesepin

---

☆ :: Hib 1:1    ☆ :: Hib 2:3    ☆ :: Pol 4:36    ☆ :: Pol 11:25-26;  
13:1-15:41    ☆ :: Pol 18:24,28

texoni ngan taxa pris xil di tamu latesa sanien eo e Nim Eo ak.✧

*?Visi iaxa tevuli uvei ak tetiamu?*

Uvei ak, latetisi teha mi Kristin xil xa latehe Siu.✧ Vengan xa haram xil holu tetavi ngamu, xil holu latestokovein neketen nae e Iesu tangan latilomun e lavusil xat rae na Siu xil.✧ Latetis uvei ak tangan vapisen ni mi Siu xil xa Iesu be eilep mak mu mili sen holesok xil xa di latehusili tetiamu, e tehe xi iaxa tesak ni naha xa Hi teling xati tangan istal mei be reitin. Ma, momal tangan Kristin xil lihur xat neketen nae e Iesu e liloh ixeh e lohen te neketen nae itel sien.✧

*?Latetis uvei ak veneh?*

**Latetis uvei ak tangan vapisen ni xa Iesu be eilep mak mu mili holesok xil vus xa Siu xil di laling neketen nae di en.**

Iesu be eilep mak mu mili provet xil tetiamu.✧

Iesu be eilep mak mu mili masxaxa xil.✧

Iesu be eilep mak mu mili Mosis.✧

Iesu be eilep mak mu mili Sosua.✧

Iesu be eilep mak mu mili vatixar na pris xil.✧

Iesu be eilep mak mu mili pris xil xa lapol e Nim Eo.✧

Polien na Iesu be eilep mak mu mili polien xil vus xa latepol ni e Nim Tavolin na Hi.✧

Re Iesu tesak ni hitxatien hu na Hi mei tehos mak mu teli hitxatien matu nan.✧

---

✧ :: Hib 5:1-11; 8:3-5   ✧ :: Hib 1:1   ✧ :: Hib 6:4-6   ✧ :: Hib 12:1   ✧ :: Hib 1:1-3   ✧ :: Hib 1:4-14; 2:5   ✧ :: Hib 3:1-6   ✧ :: Hib 4:6-11   ✧ :: Hib 5:1-10; 7:26-8:2   ✧ :: Hib 6:20-7:25   ✧ :: Hib 8:3-6; 9:1-28   ✧ :: Hib 8:7-13

Sanien eo te meulien na Iesu bos mak mu mili  
sen sanien eo xil vus xa tetiamu.✧

Nggo Iesu, ulixir takan ti tangan ramei visal  
Hi vaxoni ngan xa mol-Isrel xil tetiamu  
ulixil tekan pupu tangan lamei visali e Vathu  
Senae.✧

**Latetis uvei ak tangan vasel xat Kristin xil  
tangan lisoh ixeih e neketen nae** - Kristin xil  
holu xa latehe Siu latehur sakpurunien xil holu  
texo he Siu sav xil xa latehit rae xil te hitxatien  
te xeih matu na Hi tehos mak mu. Xil latehisu mi  
sakpurunien xil texo he ngan xil xa latave Siu ti xa  
latehit hi xil labe holu e iexil tehei tangan lavusil  
sexien tesa xil. E latehisu mi sakpurunien xil texo  
he ngan xil te kavmen te hal Rom xa di latehiteni  
latehit tehe Kristin xil iaxa di latelihi an tesa xil  
temei xa tesak ni mae kekaten xa mahulong di teat  
moletin xil. Ma, xil latepurun Kristin xil e latehas  
xil holu latelel. E uvei ak te Hibru di misel xat  
Kristin xil tangan listokovein nenexoen e tesaen  
nae xil vus, e liloh ixeih e lohen te neketen xa Hi  
teling xil en tetel nenemien xa lituxoh hoxalite  
teni.✧

*Vatit nenemien tei te uvei ak de Hibru 1:1-3*

Tetiamu, Hi tesepin mi avu nar xil melele xil  
holu e texo suse xil holu texo provet xil. E, e  
Melengien Kor xil xa radi en xiak, Hi tesepin mi  
xir texo Natneli xa tepeas kokot ni holesok xil  
xa ladi. E tehosei Natneli tangan iling holesok  
xil vus ak ihe hen. Xi nggoni Hi e rin xil vus,  
e di pisen minehinen te xeihen na Hi nggoni  
kilas tei xa di pisen minehinen te eai. Del xeihen

---

✧ :: Hib 10:1-14   ✧ :: Hib 12:18-24   ✧ :: Hib 12:1

te sepinien nan, Natneli di misak ni holesok xil vus xa tepeas ni mei di tak duxoh xosali nggusil nenemien nan. E melele xa Nat Hi tepol vuol ni holesok xil tangan vakas moten moletin xil mei lamese ra tesaen nae xil tangan Hi vaketeh vahos rilomun mi xil, xi teha tetotan e ut nesao e rin metu te von xeihen na Hi xa minehinen te xeihen nan eilep pupu.

*?Naha iaxa di e uvei ak?*

1. Naha xa Hi tepisen ni mi xir nggo Natneli bos mak mu mili naha xa tepisen ni texo provet xil tetiamu. (1:1-4)
2. Iesu be eilep mak mu mili eilep xil tetiamu. (1:5-7:28)
  - a. Iesu be eilep mak mu mili masxaxa xil. (1:5-2:18)
  - b. Iesu be eilep mak mu mili Mosis. (3:1-4:13)
  - c. Iesu be eilep mak mu mili pris xil xa lastal langgo vatimol na Eron. (4:14-7:28)
3. Polien na Iesu nggoni vatixar na pris xil bos mak mu mili polien xil vus xa latepol ni tetiamu e Nim Tavolin. (8:1-10:18)
  - a. Hitxatien te xeih hu bos mak mu mili hitxatien te xeih metu. (8:1-13)
  - b. Nim Eo e ut nesao xa Iesu di pol en bos mak mu mili Nim Tavolin tetiamu. (9:1-10)
  - c. Sanien eo na Iesu bos mak mu mili sanien eo xil vus xa tetiamu. (9:1-10:18)
4. Sexien xil xa di ranggusil Hi nggo suse te neketen bos mak mu mili sexien xa di rasak pisi tangan ravusili nggo suse te rae xil na Siu xil. (10:19-12:29)
  - a. Selxatien tangan ulixir nakan ti tangan rave visal Hi. (10:19-25)

- b. Selxatien tangan rinastokovein neketen nar ti. (10:26-31)
  - c. Selxatien tangan risoh ixeih e neketen nar. (10:32-12:13)
  - d. Selxatien tangan meulien nar imese tevi. (12:14-17)
  - e. Selxatien tangan rilong xat Iesu e rinasin hitxatien te xeih hu na Hi ti. (12:18-29)
5. Sepinien kor. (13:1-25)

### *Hi tesepin mi moletin xil texo Natneli*

<sup>1</sup> Tetiamu, Hi tesepin mi avu nar xil melele xil holu e texo suse xil holu texo provet xil.

<sup>2</sup> E, e Melengien Kor xil xa radi en xiak, Hi tesepin mi xir texo Natneli xa tepeas kokot ni holesok xil xa ladi. E tehosei Natneli tangan iling holesok xil vus ak ihe hen.

<sup>3</sup> Xi nggoni Hi e rin xil vus, e di pisen minehinen te xeihen na Hi nggoni kilas tei xa di pisen minehinen te eai. Del xeihen te sepinien nan, Natneli di misak ni holesok xil vus xa tepeas ni mei di tak duxoh xosali nggusil nenemien nan. E melele xa Nat Hi tepol vuol ni holesok xil tangan vakas moten moletin xil mei lamease ra tesaen nae xil tangan Hi vaketeh vahos rilomun mi xil, xi teha tetotan e ut nesao e rin metu te von xeihen na Hi xa minehinen te xeihen nan eilep pupu.

### *Nat Hi be eilep mak mu mili masxaxa xil*

<sup>4</sup> Hi tesak ni Natneli mei be eilep mak mu mili masxaxa xil. Vengan xa his xa Hi tesa ni mini be eilep mak mu mili hisexil. ☆

---

☆ **1:4:** Efes 1:21; Plp 2:9

<sup>5</sup> Ngan ak be reitin vengan xa Hi tenaviteni ti mi masxaxa tova tenavit,

*“Xouk obe Natuxoli,  
e xosali, inou mei nabe Tamom.” (Sam 2:7)✧*

E mi masxaxa tova mun, Hi tenaviteni ti tenavit,

*“Inou nihe Tamen,  
e xi ihe Natuxoli.” (2Saml 7:14)✧*

<sup>6</sup> Di, melele xa Hi tesil muimol nan temei e ut etan, tehiteni tehiti,

*“Masxaxa xil vus na Hi ti limot mini.” (Dut 32:43) ✧*

<sup>7</sup> E, e rin te masxaxa xil, tehiteni tehiti,

*“Hi misak ni masxaxa xil labe rute xa di misil xil  
laba en nggoni ngan xa labe votiang xil.*

*E labe moletin te polien nan xil xa di misa xei-  
hen mi xil nggoni ngan xa labe upang xa di  
minggan.” (Sam 104:4)*

<sup>8</sup> E usil Natneli, Hi biteni bit,

*“Lelaxatien nam, O Hi, ita vehakut xa vehakut tang.  
Xouk di olaxat kuh moletin nam xil nggusil  
naha xa momal.*

<sup>9</sup> Iem bei holesok xil xa momal  
*e iem nggat sexien xil xa mikavui.*

*Mak, ma inou, Hi nam, natehosei xouk teng an uhur  
merereen e sien*

*xa ileli ngan xa ngan xil xa ladi visaluk late-  
huri.” (Sam  
45:6-7)*

<sup>10</sup> E xi tehiteni mun tehiti,

*“O Suv, tetiamu, otepeas ni ut etan,  
e otepol ni tilang hat tetel holesok xil xa ladi en.*

<sup>11</sup> Tave ti neta xa holesok xil ak likesae, e xouk uta vehakut.

---

✧ 1:5: Pol 13:33; Hib 5:5 ✧ 1:5: 1Kron 17:13 ✧ 1:6: Sam 97:7

*Holesok xil ak mei lihe neta metu e limerer  
lixoni talmusu xil.*

<sup>12</sup> *Reitin, xouk uso viton xil lixoni talmusu xil e uso  
xil liha.*

*E uxoles xil ixoni labe eising xil tang  
e upol ni holesok xil vus mei lihe neta hu.*

*E xouk utat imak tang vehakut,  
meulien nam navus ti vatova.”* (Sam  
102:25-27)

<sup>13</sup> *Hi tenaviteni ti mi masxaxa tova tenavit,  
“Xouk mei utotan e von xeihen inggak e riuk metu  
ituxoh melele xa niling ngan xil xa labe elu nam  
liti pe hem.”* (Sam 110:1)

<sup>14</sup> ?Masxaxa xil labe naha? Xil labe ninin xil xa di  
lapol mi Hi. E xi di misil xil laba tangan latutou  
ni ngan xil xa xi tehosei xil tangan iteh meulien e  
xil. ☆

## 2

*Xosxa ranem male ni longeongen hos na Hi,  
rasakras ralesae reling ekaten na Hi*

<sup>1</sup> Mak, ma vengan xa Nat Hi be eilep mak mu  
mili masxaxa xil, xir rixuxou kuhi tangan riteli  
ixeih e reitinen ak e rinamaen nenemien nar ti  
nasal nave relingi.

<sup>2</sup> Rae xil tetiamu xa Hi tehithiteni mi avu nar  
xil texo masxaxa xil tehe reitin. E ngan xil xa lat-  
nahusili ti mu latnalong xati ti latehur pangasien  
xa momal tangan lavuri. ☆

<sup>3</sup> ?E xosxa avu nar xil lasakras lalesae reling  
pangasien ak, ma itep mi xir xosxa di ranem male  
ni longeongen xa eilep xiak usil midep iaxa Hi di

मितेह मेुलियेन ए मोलेतिन खिल? पंगसियेन खा इमेइ मि खिर इहे ऐलेप पुपु. ए सुव इेसु वरि तेहिथितेन कोकोत नि लोण्गेण्गेन होस अक. डि, ण्गण खिल खा लेतेण्गेन नि लेतेहित रति तेमेइ ए वलकेशो तेंगण मेइ रिक्किला खा बे रेइतिन. ☆

<sup>4</sup> ए हि तेपिसेन नि खा बे रेइतिन तेखो मेरेकेल खिल ए होलेसोक सव खिल खा तेल्लेप. ए रापुसि मुण्ण खा बे रेइतिन ण्गो सानियेन खिल खा निनिन एओ डि मिसा केकेस नि मि मोलेतिन खिल ण्गुसिल नेनेमियेन ना हि. ☆

*हि तेहोसेइ इेसु क्रिस्तो तेंगण मेइ इहे ऐलेप मक मु इलि होलेसोक खिल वुस ण्गो लोण्पंगसियेन ए मतेन नान*

<sup>5</sup> मेलेले खा डि नसेप उसिल उत एतण्ण खा हि इसक नि मेइ इहे नेता हु, बोस तेंगण मुक्किला खा तेनाहोसेइ मसखखा खिल ति तेंगण वलिंग होलेसोक खिल अक हा वति पे हेखिल.

<sup>6</sup> वेंगण ण्गोणि ण्गण खा वणुवेइ एओ तेहितेनि ए उत तेइ तेहित,  
“ओ हि, मोलेतिन खिल लबे नहा इाखा डि ओनेम उसिल खिल मक?”

*?वेनेह मा डि ओलखत कुह नात मोलेतिन खिल मक?*

<sup>7</sup> ओतेसक नि खिल मेइ लेतेहे एतण्ण मक मु नि मसखखा खिल तेहे वुतेइलि तंग.

*ए तेतुतुओ सुण्ण, ओतेसा वण्ण मेरेरेण्णेन मि खिल ए ओतेलिंग वत लुवलुव ते लेलखतियेन तेति ए वतियिल.*

<sup>8</sup> खौक ओतेलिंग होलेसोक खिल वुस खा ओतेपेस नि लदि पे हेखिल तेंगण लिलखति.” (सम 8:4-6)☆

मेलेले खा बिनेनि बि, हि “तेलिंग होलेसोक खिल वुस खा तेपेस नि लदि पे हेखिल तेंगण लिलखति,” राक्किला खा नेता तोवुओल खा लालखति ति. तवे ति नेता खा ण्गण अक बे रेइतिन, तखेअक डि रातापुस खिल ति खा होलेसोक खिल डि लालोण्ण खत राे मोलेतिन खिल.



<sup>9</sup> E rapus Iesu xa *tehe vuteili tang mei tehe tan mu ni masxaxa xil*. E taxeak, rakila xa di nggur von *merereen e vatluvoluv te lelatien de vatin* vengan xa tehur longpangasien xil e temat tehinat xir. Reitin, ve eheien hos nan, Hi teling xati tangan Iesu imat ve rin na moletin xil vus. ✧

<sup>10</sup> Holesok xil vus xa Hi tesak ni xil ladi, ladi tangan lapien xeihen nan e lapet rat hisen. E momal tevi xa Hi temaen Iesu tangan vahisu ni longpangasien xil tangan vasak ni mei vama tevi tangan, itutou ni, ha imat e iteh meulien e moletin xil. Ve rin ak, Hi tesak ni Iesu mei tehe eilep mak mu ni horamue sav nan xil tangan itiamu ni xil ha liti visali e minehinen te xeihen nan.

<sup>11</sup> Ma Iesu del ngan xil xa tekas moten xil lamese ra tesaen nae, Tamexil tei takes. Misak ni, Iesu tave unoun ti tangan vakes xil ni tuneli mu hineli xil. ✧

<sup>12</sup> Vengan xa xi tehiteni mi Hi tehit,  
*“Inou nihithiten usiluk mi tuxoli e hinoxoli xil.  
 Melele xa xamem mumei vituei, inou nisa  
 memesien ihat minuk.”* (Sam 22:22)

<sup>13</sup> Xi tehiteni mun tehit,  
*“Inou niling nenesien navan e Hi.”* (Aes 8:17) ✧  
 E xi tehiteni mun tehit, *“Inou xiak, del horamue xil  
 xa Hi tesa ni minou.”* (Aes 8:18)

<sup>14</sup> Vengan xa horamue xil ak labe moletin xil xa tenbexil e rexil di, Iesu mun teme i texoni xil. Tepol ni temak tangan, texo maten nan, xi mikila vahas tan ni Temat xa di tetal xat xeihen te maten. ✧

---

✧ **2:9:** Plp 2:8-9 ✧ **2:11:** Mat 25:40; Mak 3:35; Sion 20:17 ✧ **2:13:** 2Saml 22:3; Aes 12:2 ✧ **2:14:** Sion 12:31; 1Sion 3:8; Rev 12:10

<sup>15</sup> E texo rin ak, Iesu telal rat ngan xil xa ulikannen te maten tevar xat xil e melengien xil vus te meulien nae tangan ha lameluv.

<sup>16</sup> Makila xa Iesu tenamei ti tangan vatutou ni masxaxa xil. Xi teme *“tangan vatutou ni ngan xil xa lastal langgo vatimol na Ebraham.”* (Aes 41:8-9)

<sup>17</sup> Mak, ma momal xa xi teme texoni tuneli e hineli xil e rin xil vus. E, texo suse ak, xi mei tepolu ni esaeen ve xil e mikila vatutou ni xil nggoni vatixar na pris xil xa tepol vuol ni holesok xil xa Hi teling xati tangan ipol ni. Xi tesa xoteh meulien nan texoni sanien eo tei tangan vaserev rin na moletin xil pe met Hi e vasak ni Hi mei vaketeh vahoş rilomun mi xil e nanem ti mun usil tesaen nae xil. ✧

<sup>18</sup> E vengan xa xi mun tehur sakpisien e longpangasien xil, xi ikila itutou ni ngan xil xa di langgur sakpisien xil. ✧

### 3

*Hi pisen ni xa Iesu be eilep mak mu mili avu Mosis tetiamu*

<sup>1</sup> Tuxoli e hinoxoli xil, Hi xa de ut nesao tekes xir tangan mei rimos vituei e rihe moletin eo nan xil. Ihos pupu tangan munem usil Iesu Kristo, ngan xa Hi tesila texoni eloheoh nan mi xir, e tepol texoni vatixar na pris xil e rin te neketen nar pe met Hi. ✧

<sup>2</sup> E Iesu tepol vuol ni holesok xil vus xa Hi teling xati tangan ipol ni. Ngan ak texoni Mosis, xa *“tepol*

---

✧ **2:17:** Plp 2:7; Hib 2:14; 1Sion 2:2; 4:10 ✧ **2:18:** Hib 4:15 ✧ **3:1:** Hib 4:14; 6:20; 7:26; 8:1; 9:11

*vuol ni holesok xil e nim na Hi,*” (Nam 12:7) xa koute teni be moletin nan xil.

<sup>3</sup> E moletin xa pol ni nim tei, lasa merereen mini mili merereen xa lapišen ni ve nim kestang. E nggusil rin ak, momal tangan merereen xa lasa ni mi Iesu ili ngan xa latesa ni mi Mosis.

<sup>4</sup> Be reitin xa nim xil vus, moletin tei tepol ni. E Hi, xi vari tepol ni holesok xil vus.

<sup>5</sup> Mosis tepol sen holesok xil vus xa tehos tehusil nenemien na Hi texoni moletin te polien hos tei e nim na Hi. E tesep usil holesok xil xa ti lisep usili e melele xil xa ti imei.

<sup>6</sup> Kristo mun tepol sen holesok xil tehusil nene-mien na Hi. E xi tepol texoni Natneli xa be eilep mak mu mili Mosis e nim na Hi. E xir vari iaxa rabe nim nan ak xosxa ulixir nakan ti, e nenemien nar ixeh e holesok xil xa di raling nenesien nar di en. ✧

*Selxatien tangan rinanem male ni rae Hi ti e naha xa ien bei tangan vapol ni e meulien nar*

<sup>7</sup> Bos tangan riteong ni selxatien na Ninin Eo melele xa biteni bit,

*“Xosali, xosxa mulong rae Hi,*

<sup>8</sup> *munanem male ni ti naxoni avu namim xil xa tetiamu di latepol ni e melele xa latekavitou ni,*

*e naxoni ngan ti mun xa latepol ni e uruvuol tangan lasak pisi. ✧*

<sup>9</sup> *Hi tesep usil xil tehit,*

*‘E rute ak, avu namim xil latehit lasak pis inou tangan lapus ti xa natete visal xil mu natnara ti visal xil,*

*tave ti neta xa latepus holesok xil vus xa  
natepol ni ni metexil huram hanutap lu (40)  
ngamu.*

**10** *Tesak ni, ieok teat ngan xil vus te melele nen ak.  
Vehakut, latepol ni vatixil texeih xat inou,  
e latehit linakil ti suse xil xa ieok bei tangan  
nitel xil liha en.*

**11** *Tesak ni, ieok teat xil e natehit xati  
xa linava ti e rute xa nateling xati tangan liha  
lingel kuhi en.’ ” (Sam 95:7-11)✧*

**12** Tuxoli e hinoxoli xil, muxuxou kuhi tangan xamim kekes munahur ti nenemien xil xa misa xa nasak ni neketen namim namot e munakavitou ni Hi ti xa meul.

**13** ‘Xosali’ xa latesep usili xiak di tamu be melele xa radi en taxeak. Ve rin ak, mesal da tamu tangan muhiles meulien namim. Ma, vehakut xamim kekes ti musel xat xamim mun tang tangan munamaen tesaen ti naluyos xamim e nasak ni xamim ti munanem male ni rae na Hi.

**14** Vengan xosxa risoh ixeih e neketen nar ha ituxoh hoxalit meulien nar, ma ripisen ni xa di rabisti del Kristo reitin. ✧

**15** Ngan ak nggoni naha xa Vanuvei Eo biteni bit,  
“Xosali, xosxa mulong rae Hi,  
munanem male ni ti naxoni ngan xa avu namim  
xil tetiamu latepol ni e melele xa latekavitou  
ni.” (Sam 95:7-8)✧

**16** ?Visi xil iaxa latelong rae Hi e latekavitou ni? Tehe ngan xil vus xa lateti pe he Mosis xa Hi teleh rerat xil ra kantri te hal Isip. ✧

✧ **3:11:** Nam 14:21-23✧ **3:14:** Hib 3:6✧ **3:15:** Hib 3:7-8✧ **3:16:** Nam 14:1-35

17 ?E visi iaxa Hi ien teat xil huram hanutap lu (40)? Ien teat moletin xil xa latepol tesa, ma tesak ni xil kekes latekiri e latelel e uruvuol. ✧

18 ?E mi visi iaxa Hi tehiti xati xa linava ti e rute xa teling xati tangan liha lingel kuhi en? Tehiti xati temak mi ngan xil xa latelong ras raen. ✧

19 Misak ni, rapusi xa xil latnava ti e rute ak vengam xa iexil ti tenavei tangan laling neketen nae en.

## 4

*Hi bit xati xa moletin nan xil ha liti e ut te ngen-  
gelen*

1 E xosali, ngengelen xa Hi tehiti xati tehiti isa ni mi moletin nan xil da tamu. Misak ni, rixuxou kuhi xa ti e xir nale ras suse nan xa ihuri ha ituxoh ut te ngengelen nen ak.

2 Vengam xa xir ralong longeongen hos nggoni ngan taxa mol-Isrel xil tetiamu latelonge. E longeongen hos ak tenatutou ni ti xil vengam xa melele xa latelonge, latnahuri ti vatel neketen.

3 Nggoni ngan xa Hi tehiteni tehiti,

*“Teok teat xil e natehiti xati xa*

*linava ti e rute xa nateling xati tangan liha  
lingel kuhi en.”* (Sam 95:11)✧

Xi tehiti usil ngengelen ak, tave ti neta xa tepol vuol ni polien nan nousav ngamu melele xa tepeas ni ut etan. Ma, ngengelen ak da tamu tangan xir xa neketen nar di rikila rihuri.

4 Rakila xa ngan ak be reitin vengam xa rute tei e Vanuvei Eo biteni mak bit, *“E melengien xa be lu he sav (7), Hi mingel ra polien nan xil vus.”* (Sen 2:2)

✧ 3:17: Nam 14:29; 1Kor 10:10 ✧ 3:18: Nam 14:22-23; Sam 95:11; Hib 3:11 ✧ 4:3: Hib 3:11; 4:5

<sup>5</sup> E rapusi ngamu xa Hi tehiteni tehit, “*Linava ti e rute xa nateling xati tangan liha lingel kuhi en.*”  
(*Sam 95:11*) ✧

<sup>6</sup> Ngan xil xa latelong longeongen hos ak tetiamu, xil latnahur ti ngengelen ak vengan xa latelong ras rae Hi. Misak ni, ngengelen ak da tamu tangan moletin sav xil likila lihuri.

<sup>7</sup> Vengan xa ngan ak be reitin, Hi teling xat melengien sav tei xa moletin xil likila mei lihur ngengelen nae en. Melengien ak be ‘*xosali.*’ Hi tesepin usil melengien ak texo suv toto Deved e haram xil holu tetutou ni melele xa tehit sepinien xa ratelonge ngamu xa tehit,  
“*Xosali, xosxa mulong rae Hi, munanem male ni ti.*”

(*Sam 95:7*) ✧

<sup>8</sup> E mol-Isrel xil latnakamet ti ngengelen ak e tan te hal Kenan xa Sosua tetel xil lateha en tangan lavuri. ?Vengan xosxa latehur ngengelen nae tuei, veneh ma haram holu tetutou ni, Hi tehit usil melengien sav tei xa xil lihur ngengelen nae sung en? ✧

<sup>9</sup> E, vengan xa rin ak be reitin, melengien tei da tamu xa moletin xil na Hi lihur ngengelen hos nan.

<sup>10</sup> Vengan xa, nggo hisit sexien xa Hi tepol sen polien nan e tengel kuhi, moletin nan xil mun lingel kuhi ra polien nae xil. ✧

<sup>11</sup> Mak, ma risak pisi ixeih tangan rihur ngengelen nen ak tangan ti e xir namot vengan milong ras sepinien na Hi nggoni ngan xa mol-Isrel xil latepol ni tetiamu.

<sup>12</sup> Mak, ma rilong xat sepinien na Hi, vengan

---

✧ **4:5:** Hib 3:11; 4:1 ✧ **4:7:** Hib 3:7-8 ✧ **4:8:** Dut 31:7; Sos 22:4

✧ **4:10:** Sen 2:2; Hib 4:4

xa xeihen e meulien da en. Sepinien nan mikan mili tiei xa mikan e rin xalu vus, vengan xa mikila vasal tine moletin tei vaha vuma ... vali rute xa hisi di bisti del sin, e vatuxoh rute xa ninin e nenemien nan di en. Reitin, sepinien na Hi di midil tinexir e di pisen kil naha xa di e tinexir e nenemien nar xil, e di milepisi. ☆

<sup>13</sup> Neta tovuol mikila vaxus ra Hi, vengan xa xi mikil holesok xil vus. E melengien tei, xir kekes risoh pe meten e risepin ni rin nar mini.

*Iesu be vatixar na pris xil xa di misoh pe met Hi e rin nar*

<sup>14</sup> Be reitin xa ti risoh pe met Hi. E be reitin mun xa Iesu, Nat Hi, be vatixar na pris xil e ba ngamu e ut nesao tangan ha isoh pe met Hi e rin nar. Misak ni, rihur xat neketen nar ixeih xa di rabbit rati xa rangguri ngamu. ☆

<sup>15</sup> Vatixar nar mikil merouen te tenbe moletin e xi polu ni esaeen ve rin nar. Vengan xi mun tehur sakpisien xil e suse xil vus nggoni ngan taxa xir di rangguri, e xi tenamot ti e tesaen. ☆

<sup>16</sup> E vengan xa Iesu di pol ve rin nar, ulixir nakan ti tangan rihe visal Hi xa di dotan e von xeihen nan. Ma, e melengien xil vus xa iexir bei tutouen na Hi, ripusi xa xi ipisen esaeen e eheien hos nan mi xir. ☆

## 5

<sup>1</sup> Melele xa laling moletin tei mei be vatixar tei na pris xil, labosei ra moletin xil tangan vapol e vasoh pe met Hi ve rin nae. Misak ni, xi mikila

☆ **4:12:** 1Pit 1:23; Aes 49:2; Efes 6:17; Rev 19:15; Sion 12:48

☆ **4:14:** Hib 3:1; 6:20; 7:26; 8:1; 9:11; 10:23    ☆ **4:15:** Hib 2:17

☆ **4:16:** Hib 10:19

vasa sanien eo xil mi Hi ve rin nae, e vasak ni re vongoro xil valeh ve tesaen nae xil.

<sup>2</sup> E vengan vatixar mun be moletin tei xa merou, mikil kuh merouen na moletin xil. Mak, ma di pol merou del ngan xil xa latakil kuh ti suse xa momal e di lasavut vuteili en. ✧

<sup>3</sup> E vengan xa vatixar mun be moletin xa merou mak, xi isak ni re vongoro xil ileh ve tesaen nan tasen itel tesaen na mosav xil mun. ✧

<sup>4</sup> E moletin tei tahusil nenemien nan tasen ti tangan vahur polien xa eilep xiak, e be Hi kestang iaxa di bosei ngan xa mei ihe vatixar na pris xil, nggoni ngan xa tepol ni mi Eron. ✧

<sup>5</sup> E Kristo mun tenamei ti vahe vatixar vahusil nenemien nan tasen tangan vapet rat hisen. E Hi vari iaxa tehosei tangan vahur polien ak xa tehit, *“Xouk obe Natuxoli, e xosali namei nabe Tamom.”* (Sam 2:7)✧

<sup>6</sup> E rute sav mun biteni bit, *“Xouk mei uhe pris tei te vehakut, ngan xa ixoni pris Melkisedek tetiamu.”* (Sam 110:4)✧

<sup>7</sup> E meulien nan e ut etan, Iesu tesis teha mi Hi e tetakesi ve tutouen tetel simeten. Reitn, tekei texeih teha mi Hi xa mikila vateh meulien nan ra maten. E Iesu temerere ni Hi, tepol ni nenemien nan tehe tan, e teling meulien nan teti pe hen. Mak, ma Hi teteong ni sisen nan xil. ✧

<sup>8</sup> E neta sav xa xi be Nat Hi, Hi tepispisi mini ni sexien te longxatien texo longpangasien xa xi tehisu ni.

✧ 5:2: Hib 2:17; 4:15 ✧ 5:3: Lev 9:7; 16:6 ✧ 5:4: Eks 28:1

✧ 5:5: Pol 13:33; Hib 1:5 ✧ 5:6: Hib 6:20; 7:17 ✧ 5:7: Mat 26:36-46; Mak 14:32-42; Luk 22:39-46



9-10 ✨E melele xa Hi tepusi xa Iesu mei tepin tevi, tepol ni mei tehe vatixar na pris xil xa texoni pris Melkisedek tetiamu tangan vapol pe meten e rin na moletin xil. Nggo rin ak, Iesu Kristo mei teteh meulien e ngan xil vus xa lalong xati e tepol ni suse tangan lihur meulien sal ixo en.

*Selxatien tangan moletin xil linastokovein neketen nae ti*

<sup>11</sup> Xamem manggur holesok holu xa iemem bei tangan maviteni mi xamim usil holesok xil, e minggeih tamu tangan mulong kila vengan xa iemim ti tavei mun tangan mulong kil sepinien xil ak.

<sup>12</sup> Melengien pipin tangan xamim mumei muve titsa xil ngamu xa ti mupispisi mi moletin sav xil e rin te holesok xil te neketen. E neta sav xa mak, napusi tehiti momal tangan xamim muvur pispisien kokot xil xa taxeih ti usil longongen hos na Hi vatei mun. Xamim munggoni tutut horamue xil tamu xa mutamatu ti mu tangan muva anien xil xa nggeih, e di tamu musus xat pispisien xil xa lataxeh ti langgoni melik tang. ✨

<sup>13</sup> E ngan xil xa di lasus xat melik te pispisien xil xa lataxeh ti, labe tuvava tamu, e latapin ti tangan lalong kila xa itep iaxa moletin xil mei limal pe met Hi.

<sup>14</sup> E pispisien xil xa nggeih vuteili langgoni anien xa nggeih be a ngan xil xa lamatu ngamu. Ngan xil ak lakila lapus kil naha xa bos e naha xa misa vengan xa, e meulien nae, vehakut di

---

✨ 5:9-10: Aes 45:17 ✨ 5:9-10: Sam 110:4; Hib 5:6 ✨ 5:12: 1Kor 3:1-3; 1Pit 2:2

langgusil xat neta xa lakila labit nggusil sepinien na Hi. ✧

## 6

<sup>1</sup> Mak, ma ihos tangan ti risep usil pispisien sav xil xa isak ni xir mei rimatu kuhi e neketen nar. Reitin, rinatit ni ngan taxa di rasepin vehakut usil pispisien kokot xil usil Kristo xa tameas ti xa momal tangan mutehusili ngamu, pispisien xil xa be vatit neketen namim: ixoni itep iaxa muhiles ra sexien xil xa be neta sav tang xa lasakras lasa meulien mi xamim, e itep iaxa mukila muling neketen namim e Hi. ✧

<sup>2</sup> Tamal ti tangan xamem matilomun mei mapispisi mi xamim vatei mun usil sexien xa muhe baptaes ni moletin tei, sexien xa muling hemim en, mu naha xa istal e melele xa moletin xil limea rilomun ra maten e lisoh pe met Hi e Melengien te Lepisien.

<sup>3</sup> Mak, ma xosxa Hi imaen ni, rihur pispisien xil xa isak ni xir ha rimatu pilei mu e neketen nar.

<sup>4</sup> ?E itep mi ngan xil xa latehur neketen nae ngamu, e di, latestokovein ni mun? ?Hi ihiles xil vatei mun tangan lihur neketen nae vatei mun? E-e, Hi naviles xil ti mun. Vengan xa, tetiamu, mei latele kil kuh miehen te longeongen hos na Hi, latekar pis sanien te ut nesao xa be meulien hu nae nggo Iesu Kristo, e Ninin Eo mei tese xat xil texoni ngan xa tepol ni mi Kristin sav xil. ✧

<sup>5</sup> Xil latekil kuhi xa sepinien na Hi bos, e latepus kuh xeihen xa Hi ti ipisen ni ixo holesok xil xa istal e melengien xil xa ti imei.

---

✧ **5:14:** Rom 16:19    ✧ **6:1:** Hib 9:14    ✧ **6:4:** Mat 12:31; Hib 10:26-27; 1Sion 5:16

<sup>6</sup> Ma, xosxa lakil holesok xil vus ak, e di, las-tokovein neketen nae, Hi naviles xil ti vatova mun tangan mei lavur neketen vatei mun. Vengan xa sexien nae xil nggoni ngan xa xil vari iaxa di ladi xat Nat Hi de eivave vatei mun pe met moletin sav xil, e di lasak ni mosav xil mei lanem male ni.

<sup>7</sup> Tine moletin nggoni tan. Rut tan, melele xa us di mus en vehakut e moletin xil di lapol en, anien hos xil di lastal e lameul en. Ma Hi di duxol xati.

<sup>8</sup> E rut tan, husmunae e ao tesa tang di lastal e lameul en. Tan ak tavos ti pe met Hi e, nave nousav ti, isa halesil iha xati, ilas moten ni, e isahan upang ia len ni. ✧

<sup>9</sup> Tuxoli e hinoxoli xil, neta sav xa di nasel xat xamim mak, nanesi xa xamim di munggusil xat Hi nggeih, e sexien namim pipin ni ngan xil xa mutehur meulien hu vengan xa Hi teteh meulien e xamim.

<sup>10</sup> Hi pol ni naha xa momal vehakut. E ien nabong ni ti holesok xil xa di mupol ni vengan xa eheien namim da en: polien xa di mupol ni e tutouen xa di tamu musa ni mi mosav xil xosali ak. ✧

<sup>11</sup> Xamem iemem bei tangan xamim kekes muling nenemien namim ixeh tangan mupol imak iha ituxoh melele xa mupus hoxalit lohen te neketen xa xamim mudi en. E ti mupol imak venggan mukila xa, e melele nen ak, mupusi xa holesok xil xa muling nenesien namim en be reitin.

<sup>12</sup> Xamem iemem ti tavei tangan xamim muve mah, e ihos mak mu xa mupol ixoni ngan xil xa nenemien nae teviei e di lasoh nggeih e neketen

nae. Vengan xa, nggo sexien xil ak, xil di langgur naha xa Hi tehit xati mi xil.

*Rakila xa hitxatien xil na Hi be reitin*

<sup>13</sup> Melele xa Hi tepol ni hitxatien nan tetel avu Ebrahim, xi tesuv xati tetel hisen vengan his tovuol mun xa vahe eilep mak mu vali hisen. ☆

<sup>14</sup> Xi tehiteni temak tehit, *“Reitin li, inou iaxa nabit xati xa nituxol xatuk ihe eilep e nipol ni vati-mol nam xil xa listal lixo xouk lihe holu xa lihe holu pupu.”*  
(*Sen 22:17*)

<sup>15</sup> Mak, ma melele xa Ebrahim tetatil huit hitxatien na Hi tetel nenemien xa tehe teviei teha vuma ... tepus reitinen teni.

<sup>16</sup> Melele xa moletin tei bit vasak ni hitxatien nan mei vaxeih, xi di misuv xati del neta tei xa nggeih mu mili xi tasen. Vengan, melele xa misuv xat hitxatien nan mak, ngan tesav xil like reitin en e latangor ti mun usili. ☆

<sup>17</sup> Nggo hisit sexien ak, melele xa Hi ien tehei tangan vapisen ni xa naviles nenemien nan ti mi ngan xil xa lihur huit hitxatien nan, tesuv xati tetel hisen.

<sup>18</sup> Reitin, Hi xa misakras valuvos tepol ni sexien lu xa lusakras lalhilhiles. Xi tehit xati xa xi ituxol xat xir, e tesuv xat hitxatien nan tetel hisen. Misak ni, xir xa ranggus radi pe hen rihesi xir, vengan xa rakila ranesi xa neta xa Hi tehit xati tehit ipol ni e rin nar, ti ripes huiten teni mei istal. ☆

<sup>19-20</sup> Nenesien ak nggoni angka te meulien nar xa ihur xat xir tangan rinasal ti. E rakila xa Hi ipol sen naha xa xi tehit xati vengan Iesu, xa nggoni pris Melkisedek tetiamu, xi di pol ve rin

☆ **6:13:** Sen 22:16 ☆ **6:16:** Eks 22:11 ☆ **6:18:** Nam 23:19; 1Saml 15:29

nar. Reitin, Iesu, xa raling nenesien nar da en, xi ba diamu ni xir be vangit Nim Eo xa de ut nesao, e di mikakao mili kaliko xa dakoe xol ut xa be eo xa be eo pupu xa Hi da en. E rute ak, xi di misoh pe met Hi ve rin nar nggoni vatixar na pris xil te vehakut.✠✠

## 7

*Iesu mei be vatixar na pris xil te vehakut nggoni pris Melkisedek tetiamu*

<sup>1</sup> Nihit kila mi xamim xa Melkisedek tehe visi. Tetiamu, xi tehe suv toto te taon te hal Salem\* e xi tepol texoni pris na Hi te hal ut nesao. Melele xa Ebrahim tetilomun ra vaeen xa xi tetel moletin nan xil latehas tan ni suv toto hat (4), “*Melkisedek teha tesao ni e tesa tuxolxatien tei mini.*” (Sen 14:19)

<sup>2</sup> E “*Ebrahim tesa taet te holesok xil vus xa telehi texo vaeen ak mini.*” (Sen 14:20) Hisen Melkisedek, xa koute teni be ‘suv toto te momalen.’ E vengan xa tehe suv toto te hal Salem, xa koute te his taon ak be ‘tomat,’ xi tehe ‘suv toto te tomat’ mun.

<sup>3</sup> Vanuvei Eo taviteni ti usil tamen mu ninen, taviteni ti usil poten mu maten nan, e taviteni ti usili xa avu nan xil latehe visi. Tesak ni, xi tehe pris te vehakut nggoni Nat Hi. ✠

<sup>4</sup> Xir rapus kila xa Melkisedek tehe eilep pupu vengan xa Ebrahim, vatit avu nar, xi tesa taet mini texo holesok xil vus xa telehi texo vaeen.

<sup>5</sup> E texo re Ebrahim, Livae e ngan xil vus xa latestal texo vatimol xa mahulong nan, mei latehe

---

✠ **6:19-20:** Lev 16:2-3,12,15    ✠ **6:19-20:** Sam 110:4; Hib 5:6; 7:17    \* **7:1:** Taon te hal Salem temei tehe taon te hal Serusalem e melengien xil na suv toto Deved.    ✠ **7:3:** Sam 110:4

pris xil. E melele xa Mosis temeul teta, tesemae ni xil tangan lileh taet ra mol-Isrel sav xil, tave ti neta xa latehe tua nae xil e xil mun latexo re Ebrahim.

✧

<sup>6</sup> E Melkisedek tenastal ti vaxo vatimol xa mahulong na Livae. E neta sav xa temak, rapusi xa xi tehur taet texo Ebrahim e tesa tuxolxatien mini, ngan xa Hi tehiti xati tangan vatuxol xati.

<sup>7</sup> E rakila xa melele xa moletin tei di misa tuxolxatien mi moletin sav, xi xa misa ni be eilep mak mu mili ngan xa di ngguri.

<sup>8</sup> E rin na pris xil xa di langgur taet, xil labe moletin xil tang xa lakila lalel. E, e rin na Melkisedek xa tehur taet, nggoni ngan xa xi di tamu meul vengan xa Vanuvei Eo tenasep usil maten nan ti.

<sup>9</sup> E rakila raviteni vamak xa melele xa Ebrahim tesa taet ak, texoni ngan xa tesa ni e rin na Livae e ngan xil mun xa lateti e vatimol xa mahulong nan xa latnastal ti mu.

<sup>10</sup> Vengan xa tave ti neta xa Livae, latnapesi ti mu, melele xa Melkisedek temeiti tesao ni Ebrahim, nggoni ngan xa Livae teta tamu e tenbe Ebrahim xa be vatit avu nan.

<sup>11</sup> Melele xa Hi tesa rae nan xil mi moletin xil te hal Isrel texo Mosis, xi tesa suse tangan pris xil e vatimol na Livae lakila lapol e rin na mol-Isrel xil vus. E moletin xil lasakras mei lamal tevi vaxo polien na pris xil ak. Misak ni, latehiti usil pris sav tei xa ixoni pris Melkisedek tetiamu, ngan xa nastal ti naxo re Eron xa texo vatimol xa mahul-

---

✧ 7:5: Nam 18:21

long na Livae.†

12 E melele xa Hi tehosei pris sav tei tangan vaxoles pris xil tetiamu, momal tangan isa rae hu mun xa ixoles rae xil tetiamu.

13 E Suv nar, xa holesok xil ak di misep usili, xi testal texo vatimol sav tei xa moletin tovuol tamu vaxo en xa vapol vaxoni pris tei.

14 Reitin, Suv nar testal texo vatimol xa mahulong na Sudah.‡ E Mosis tavit usil vatimol ak ti e melele xa tesep usil pris xil. ☆

15 E rakil kuhi xa Hi texoles pris xil tetiamu melele xa rapusi xa tesak ni pris sav tei mei mistal, ngan xa nggoni pris Melkisedek tetiamu.

16 Vengan melele xa pris sav nen ak mei tehe pris, tenahusil ti rae xil tetiamu xa tehiteni tehit ixo vatimol na Livae. Xi mei tehe pris vengan xa meulien nan misakras vavus e xeihen de hen.

17 Ngan ak nggoni naha xa Vanuvei Eo tehit usili tehit,

*“Xouk mei uhe pris tei te vehakut,  
ngan xa ixoni pris Melkisedek tetiamu.” (Sam  
110:4)☆*

18 Misak ni, di rapusi xa Hi teling rae xil tetiamu latehe rin vengan xa latapin ti e di lapol votei ni naha xa labit usili.

---

† **7:11:** E vatimol lu e le tei (12) na mol-Isrel xil, Hi tehosei vatimol xa mahulong na Livae tangan mei lapol ni polien xil na Hi. E texo vatimol xa mahulong na Livae, Hi tehosei kokot ni Eron tangan mei be vatixar na pris xil e ngan xil xa langgo ren lakila mei lapol e rin na moletin xil pe met Hi nggoni pris xil (Eks 28:1). ‡ **7:14:** Vatimol xa mahulong na Sudah be vatimol xa Hi tehit xati xa suv toto xil na mol-Isrel xil listal lixo en. ☆ **7:14:** Sen 49:10; Aes 11:1; Mat 2:6; Rev 5:5 ☆ **7:17:** Hib 5:6; 6:20

19 Vengan xa moletin tovuol vamei vama! tevi pe met Hi vaxo rae xil na Mosis. Misak ni, Hi tepol ni suse sav xa rikila riling nenesien nar iti en, xa isak ni xir rikila rimei sangas mu visali ixo en. ☆

20 Melele xa Hi tehit usil suse sav ak, xi tesuv xati tetel hitxatien tei. E ratapus ti xa Hi tepol ni sexien ak e melele xa tehosei pris sav xil tangan mei lavur polien nae.

21 E melele xa Hi tehosei Iesu tangan mei ihe pris, tesuv xati ni sepinien nan tehit,

*“Inou nabe Iahova,  
e nabit xati xa xouk umei uhe pris tei te vehakut,  
e ninaviles nenemien navan ti usili.”* (Sam 110:4)☆

22 E vengan xa Hi tesuv xat hitxatien te xeih hu ak xa di pol ni del xir tetel hisen, rakila xa hitxatien ak bos mak mu mili ngan xa tetiamu. E Iesu mun iaxa di misuv xati. ☆

23 E rin sav mun, Iesu misav ni pris xil tetiamu. Pris xil tetiamu latehe holu vengan melele xa lalel, xil lasakras mun lapol.

24 E vengan xa Iesu meul vehakut, polien nan nggoni pris tei iti hen vehakut, e nasa rati ti mun mi moletin tova.

25 Misak ni, xosali e vehakut, xi mikila vateh meulien e ngan xil xa lamei visal Hi. E vengan xa Iesu di meul vehakut, xi mikila vasoh pe met Hi vehakut e vatakesi ve rin na moletin xil xa di laling neketen nae en. ☆

26 Misak ni, rapus kila xa momal tevi tangan Iesu mei ihe vatixar na pris xil xa di pol ve rin nar. Xi

☆ 7:19: Hib 9:9 ☆ 7:21: Hib 5:6; 6:20; 7:17 ☆ 7:22: Hib 8:6; 12:24 ☆ 7:25: Rom 8:34; 1Sion 2:1



be eo, memese tevi, e tenapol ni ti neta vasa. E Hi tetal rat Iesu ra moletin tesa xil e tehur rati tangan ite ut nesao. ☆

<sup>27</sup> Xi taxoni pris xil tetiamu ti. Vengan xa xil latesa sanien eo xil mi Hi e melengien xil vus. E tetiamu, xil latesa sanien eo tei mi Hi ve tesaen nae vari. Di, tetutou sung, latesa sanien eo ve moletin sav xil. E Iesu, xi tesa sanien eo tei tekes e melele xa tesa xi tasen. E Hi tepus sanien eo ak texoni ngan xa pipin te vehakut. ☆

<sup>28</sup> Rapusi xa melele xa langgusil rae xil na Mosis tangan vahosei visi e moletin xil lakila lamei lave pris xil, di labosei moletin xil te ut etan xa lamerou tang. E tetutou ni rae xil ak na Mosis, Hi tehosei Natneli tangan mei vahe vatixar na pris xil, e tesuv xat sepinien nan ni hitxatien nan. E Natneli vari mei temal tevi tangan ihur polien ak vehakut. ☆

## 8

*Polien xa Iesu di pol ni ve rin nar bos mak mu mili polien na pris xil tetiamu*

<sup>1</sup> Vatite te holesok xil vus xa xamem di mabiteni xiak: vatixar tei na pris xil da ngamu xa tepol sen holesok xil vus ak xa di matehit usili, e xi iaxa di pol e rin nar. E xi di dotan de rin metu te von xeihen na Hi e ut nesao. ☆

<sup>2</sup> Xi nggur polien te vatixar e rute xa be eo xa be eo pupu e vangit Nim Eo na Hi e ut nesao vari. Nim Eo ak be ngan xa Hi vari tekili ni, ngan xa bos mak

☆ **7:26:** Hib 3:1; 4:14; 6:20; 8:1; 9:11    ☆ **7:27:** Lev 9:7; 16:6,15

☆ **7:28:** Hib 5:1-2    ☆ **8:1:** Hib 3:1; 4:14; 6:20; 7:26; 9:11; Sam 110:1; Mat 22:44; Mak 16:19; Pol 2:34; Efes 1:20; Hib 1:3; 10:12; 12:2

mu mili Nim Tavolin xa moletin xil te ut etan tang latepol ni xa texoni ngan xa de ut nesao. ✧

<sup>3</sup> Ngan xil vus xa lateling xil mei latehe vatixar na pris xil latesa sanien eo mi Hi e latehas buluk e nani xil tangan vaserev moletin xil ra tesaen nae xil. Misak ni, momal tangan vatixar nar e ut nesao mun isa neta tova mi Hi.

<sup>4</sup> Vahit xi vata tamu e ut etan, xi nave pris tei ti, vengan pris xil ladi ngamu xa di lasa sanien eo xil nggusil naha xa Hi tesemae ni texo Mosis.

<sup>5</sup> Melele xa pris xil te ut etan ak di lamot mi Hi, di lapol ni e Nim Tavolin tang. E Nim Tavolin ak nggoni nini neta xa di rapusi e kilas tei xa reitinen teni be nim na Hi xa de ut nesao. ✧ Ngan ak nggoni naha xa Hi tehiteni mi Mosis e melele xa tesemae ni tangan vakili ni Nim Tavolin nan tehit, *“Upol ni holesok xil vus te nim ak ihusil nini Nim Eo xa natepisen ni minuk e Vathu Senae.”* (Eks 25:40)

<sup>6</sup> E xosali, polien xa Iesu di pol ni nggoni vatixar na pris xil bos mak mu mili ngan xa pris xil tetiamu latepol ni. E melele xa xi di pol pe met Hi e rin na moletin xil, di pol nggusil hitxatien te xeih hu xa bos mak mu mili hitxatien te xeih matu. Vengan melele xa Hi tepol ni, tesuv xati texo hitxatien tei xa tesak ni mei tehos mak mu. ✧

<sup>7</sup> Vahit vahe reitin xa hitxatien te xeih matu vama tevi, ma Hi napol ni ti hitxatien te xeih teimun.

<sup>8</sup> E vengan xa Hi tekameti xa moletin nan xil latehur xoteh hitxatien te xeih matu xa tepol ni tetel xil, xi tesep usil hitxatien te xeih teimun tehit, ✧

---

✧ 8:2: Nam 24:6 ✧ 8:5: Kol 2:17 ✧ 8:6: Hib 7:22; 9:15; 12:24

✧ 8:8: Ser 31:31-34

*“Inou, Iahova, nabiteni xa melengien tei di bemei  
xa inou nipol ni hitxatien te xeih hu tei itel  
mol-Isrel xil e mol-Sudah xil.\**

*9 Hitxatien te xeih hu ak naxoni hitxatien te xeih  
matu ti  
xa natepol ni tetel avu nae xil tetiamu,  
e melele xa natetel xil ni heok  
e natetiamu ni xil latehe reling kantri te hal  
Isip.*

*E vengan xa xil latehur xoteh hitxatien te xeih xa  
latepol ni tetel nou,  
natekavitou ni xil.*

*10 Hitxatien te xeih hu xa nipol ni itel mol-Isrel xil e  
melele nen ak imak:  
Inou, Iahova, niling rae navan xil iti e nenemien  
nae  
e nitis xati iti e tinexil.*

*Inou nihe Hi nae,  
e xil lihe moletin navan xil.*

*11 Isak ni, ti e xil mun napispisi mi tuneli tangan  
vakil Iahova  
vengan xa xil vus likil nou ngamu,  
ngan xil xa latereli, ha ituxoh ngan xil xa  
latellep.*

*12 Reitin, xil likil esaeen navan vengan xa ninaketeh  
ti mun nasa mi xil  
ve holesok xil xa tamal ti xa latepol ni.*

*Io, ninanem ti mun usil tesaen nae xil  
xa teha xat rin nae.” (Ser 31:31-34)✧*

\* **8:8:** E haram 930 BC, haram xil tetiamu ni poten na Iesu, mol-Isrel xil latevae tetel xil mun tang e lateseti xil latehe vanut moletin lu. Ngan xil xa lateti e not, latekes xil ni mol-Isrel xil. E ngan xil xa latexo vatimol xa mahulong lu na Sudah e Bensamin lateti e saot, sangas visal taon te hal Serusalem, e latekes xil ni mol-Sudah xil. ✧ **8:12:** Hib 10:16-17

<sup>13</sup> Misak ni, melele xa Hi tesep usil “*hitxatien te xeih hu*” tepisen ni xa hitxatien te xeih xa tepol ni tetel xil mei be neta matu ngamu. E holesok xil xa be neta matu e tapol ti mun, nave nousav ti ma ha ikesae vari.

## 9

*Polien xa Iesu di pol ni e Nim Eo e ut nesao bos mak mu mili polien xil vus xa pris xil e ut etan di lapol ni*

<sup>1</sup> Melele xa Hi tepol ni hitxatien te xeih xa teti-  
amu tetel mol-Isrel xil, tepisen suse mi xil tangan  
likili ni nim man xa ha ti lihisu mini en, e suse xa  
momal tangan ti limot mini ixo en.

<sup>2</sup> Ma, xil latelihi tavolin tei xa mahulong, e van-  
gite teni latekesi ni Ut Eo. E rute ak lateling laet tei  
xa tesoh, e sangas visali, lateling tep tei xa beret te  
sanien a Iahova teti en. ✧

<sup>3</sup> E vangit nim ak, latesaxolen kaliko tei tangan  
iti pas vangit nim ak mei ihe rum lu (2). E rum  
xa tehe lu nen, xil latelihi tavolin teimun mei tehe  
tutut rum tei. E latekes vangit rum ak ni ut xa be  
eo xa be eo pupu. ✧

<sup>4</sup> E rute ak, lateling pesin tei xa latepol ni ni gol  
tete tep nen, e latetin vokon eo xil en. E Bokis  
te Hitxatien te Xeih na Hi mun teta en, ngan xa  
latehas xol rin xil vus ni gol. E vangit bokis ak  
lateling valit manna xa latepol ni ni gol, lateling  
eitingil na Eron xa teso hunguite, e lateling hat lu  
(2) xa latetis xat rae he xalu (10) te hitxatien te xeih  
na Hi teti en. ✧

---

✧ **9:2:** Eks 26:1-20; 25:31-40; 25:23-30      ✧ **9:3:** Eks 26:31-33

✧ **9:4:** Eks 30:1-6; 25:10-16; 16:33-34; Nam 17:8-10; Dut 10:3-5

<sup>5</sup> E latepol ni nini masxaxa lu xa latekes xalu ni sereb lutetotan luteti e led te bokis ak e rin xalu. Melele xa lutetotan temak, lutete momal ni aveouxalu teta xol von esaeen na Hi.\* E melele nen ak tave melengien xati ti tangan namit kil holesok xil vus ak mi xamim. ☆

<sup>6</sup> Melele xa xil lateling kuh holesok xil vus e Nim Tavolin, vehakut e melengien xil vus, pris xil latehe vangit nim ak e rum xa tetiamu tangan lapol ni polien nae xati en. ☆

<sup>7</sup> E, e rum xa be lu (2) nen xa tehe eo xa tehe eo pupu, vatixar na pris xil kestang tekila teha en, e tekila vapol ni ihe vatei takes tang e huram xil vus. E melele xa teha en, tepo xat pesin tei xa ra te sanien eo tei teti en tangan vaserev rin nan vatel rin na mol-Isrel sav xil mun ve tesaen xil xa latnakil ti e dit latepol ni. ☆

<sup>8</sup> Nggo sexien xil ak xa pris xil latepol ni, Ninin Eo tepisen ni xa suse xa vahe rum xa tehe eo xa tehe eo pupu xa Hi da en di tamu texus ra mol-Isrel xil. E suse ak xa be Hi di tamu texus e melele xil vus xa moletin xil di tamu latehusil sexien te moten xa latepol ni e Nim Tavolin.

<sup>9</sup> E holesok xil ak be vole tei tang mi xir te xosali ak tangan vapisen ni xa sanien eo xil vatel re buluk mu nani xil xa Siu xil di lasa ni mi Hi latapin ti. Latapin ti vengian xa sanien xil ak lasakras laserev nenemien nar mu vasak ni tinexir mei vama! tevi. ☆

---

\* **9:5:** Led nen, his tei mun teni be 'von esaeen.' Led ak texoni von xeihen xa Hi di tetotan en texoni suv toto na moletin nan xil, e di tepisen esaeen nan mi xil texo en. (Eks 25:17-22) ☆ **9:5:** Eks 25:18-22 ☆ **9:6:** Nam 18:2-6 ☆ **9:7:** Eks 30:10; Lev 16:2,14,15 ☆ **9:9:** Hib 10:1-2

<sup>10</sup> Lasakras lapol ni ti neta vengan xa di labit usil sexien xil te anienen, te munien, sexien te kas he xil en, e sexien sav xil mun tangan vasak ni tenbe moletin mei vamese vaxo hale tang. E Hi tesa sexien xil ak tangan moletin xil ti lipol ni ituxoh melele xa teling xati tangan iling kuh sexien xil xa moletin xil likila limot mini ixo en. ✧

<sup>11</sup> E melele xa Kristo temei, mei tehe vatixar te pris xil xa teleh holesok hos xil xa di rapusi ngamu. E xi di pol e Nim Eo te ut nesao xa be eilep mak mu mili Nim Tavolin te ut etan xa moletin xil tang latekili ni. ✧

<sup>12</sup> E melele xa Kristo be ut nesao, be rute xa be eo xa be eo pupu. E melele xa teha en, tenaleh ti re buluk mu re nani. E-e, tehe sangas visal Hi tetel ren xati. Texo sexien nen tak, Iesu texal rat tesaen nar xil vus e teserev rin nar vehakut xa vehakut tang pe met Hi.

<sup>13</sup> Melele xa pris xil latehusil xat rae xil tetiamu, latesak ni moletin xil xa latnamease ti pe met Hi tangan mei lamese mun del re nani xil e re buluk xil. E latepol ni xil mei latemese mun tetel oei xa latevuil xat xil ni xa latehilesi tetel vulmeas te sulut buluk xa latetin ni tehe sanien eo tei. E sexien xil ak tesak ni tenbexil mei temese textot hale tang. ✧

<sup>14</sup> E re Kristo mikila vapol ni neta xa be eilep mak mu e rin nar. Nggusil nenemien na Ninin Eo xa da vehakut, Iesu tesa xoteh meulien nan tasen xa temese tevi teha mi Hi. E ra te sanien eo nan di mikas moten nenemien nar ra sexien votei xil xa lasakras lateh meulien e xir. Reitin, ren tesak ni

---

✧ **9:10:** Lev 11:2; 11:25; 15:18; Nam 19:13    ✧ **9:11:** Hib 3:1; 4:14; 6:20; 7:26; 8:1; 10:1    ✧ **9:13:** Lev 16:3,14,15; Hib 10:4; Nam 19:9,17-19

xir mei ramese pe met Hi xa meul vehakut tangan rakila ramot mini. ☆

<sup>15</sup> Re Kristo tesak ni hitxatien te xeih hu xa Hi tepol ni tetel moletin nan xil mei tehe reitin e texeih. Misak ni, xosali, Kristo di pol pe met Hi ve rin na ngan xil xa Hi tekes xil, tangan lakila lileh holesok xil vus xa ladi he Hi xa liti vehakut xa vehakut tang, holesok xil xa tehiti xati tangan isa ni mi horamue nan xil. E rikila rileh holesok xil ak vengan xa maten nan texal rat xir ra pangasien xa imei mi xir vengan xa ratehur xoteh hitxatien te xeih tetiamu. ☆

<sup>16-17</sup> Nggusil sexien na moletin xil holu, melele xa moletin tei meul tamu, xi pol ni hitxatien te xeih tei tangan isa rat holesok xil xa di e hen mi horamue nan xil melele xa imat. E horamue nan xil linapus ti mu huite te hitxatien nan ha ituxoh melengien xa moletin ak imat. Ma lilehi sung e melele xa ngan xa tepol ni hitxatien te xeih ak imat.

<sup>18</sup> Nggusil nenemien ak, hitxatien te xeih tetiamu na Hi mei tehe reitin tehusil suse te maten, e melele xa latesak ni re vongoro xil mei teleh.

<sup>19</sup> E melele nen ak, Mosis tehiti mesen ni mi moletin xil usil rae xil vus te hitxatien te xeih ak. Di, xil labit xati tangan lihusili. Di, Mosis tepo valihe tei xa re buluk e re nani di en, e tehilesi tetel oei. Di, tehur husmunae tei xa tepepiei xa lakesi ni hisop, tevar xat hil sipsip xa pipili tete kusute, e teterir ni e ra ak. Di, Mosis tevuil ni ra teha xat uvei xa rae xil na Hi lateti en, e tevuil ni ra teha xat moletin xil vus mun. ☆

---

☆ **9:14:** 1Pit 1:18-19; 1Sion 1:7; Hib 6:1    ☆ **9:15:** Hib 7:22; 8:6; 12:24    ☆ **9:19:** Eks 24:3,6-8; Lev 14:4; Nam 19:6

<sup>20</sup> Melele xa tepol ni temak, Mosis tehiteni tehit, *“Ra ak di misa xeihen mi hitxatien te xeih xa Hi di pol ni del xamim.”* (Eks 24:8)

<sup>21</sup> E vatit suse ak, Mosis tevuil ni ra teha xat Nim Tavolin na Hi, e teha xat holesok xil vus xa tete vangit nim xa pris xil di latepol tetela melele xa di latemot mi Hi. ☆

<sup>22</sup> Reitin, melele xa latehusil rae xil tetiamu na Hi, sangas latevuil ni ra teha xat holesok xil vus, vengan, vahit latnasak ni ti re vongoro xil te sanien eo naleh, ma moletin xil lasakras laserev rin nae pe met Hi ve tesaen nae xil tangan vaketeh vahos rilomun mi xil. ☆

*Ra xa Iesu tesa ni di mikas moten xir ra tesaen nar xil e di misak ni Hi di miketeh bos rilomun mi xir*

<sup>23</sup> Nim Tavolin e holesok xil ngasen xa lateti en latexoni vole tang usil reitinen te holesok xil xa di e ut nesao. E momal tangan lihusil sexien xil ak tangan isak ni holesok xil mei limese itel ra. Ma, momal mak mu tangan lisa sanien eo tei xa ihos mak mu xa isak ni holesok xil vus te ut nesao mei imese tevi.

<sup>24</sup> Vengan xa Iesu tenave nim eo ti xa moletin xil tang latekili ni, ngan xa tehe vole tei tang te nim eo xa be reitin xa de ut nesao. Xi tehe rute xa be eo pupu xa de ut nesao vari, e ba misoh pe met Hi ve rin nar. ☆

<sup>25</sup> E melele xa Iesu tehe sangas visal Hi, tesa meulien nan mini vatei takes tang. Sexien nan misav ni naha xa vatixar na pris xil te ut etan di pol ni, vengan xa xi tehe vangit rum xa be eo xa be eo pupu e haram xil vus, e di tasa ren xati ti.



<sup>26</sup> Vengan vahit Iesu mun vaha tangan vasa sanien eo nan e huram xil ngasen, ma xi vahur longpangasien e melele xa Hi tepol kokot ni ut etan ha vatuxoh xoxalite teni tangan vasa ren e huram xil vus. E tamak ti. Vengan, e melele nen ak xa sangas holesok xil vus vatuxoh hoxalite teni, Kristo ba misoh pe met Hi melele tei takes tang tangan vasa tasen ni meulien nan vaxoni sanien eo mini tangan vaxal rat tesaen na moletin xil.

<sup>27</sup> Hi teling xati xa moletin xil vus lilel vatei takes. E itutou sung, xil lisoh pe meten e kot nan tangan ilepis rin nae xil. ✧

<sup>28</sup> Nggo hisit suse ak, Kristo mun tesa xoteh meulien nan e temat vatei takes. E Hi pus meulien nan be sanien eo tei xa mileh rerat vuol ni tesaen na moletin xil holu. E Kristo itilomun imei vatei mun, e nave ti mun tangan valeh rerat tesaen nar xil. Melele xa itilomun imei, iteh meulien e moletin xil vus xa nenemien nae nggeih en tangan litatil mei rilomunen nan. ✧

## 10

*Sanien tei takes xa Iesu Kristo tesa ni ve rin na moletin xil pipin te melengien xil vus*

<sup>1</sup> Rae xil tetiamu xa Mosis tesa ni mi mol-Isrel xil, latehe vole tang. Reitin, labe vole usil holesok hos xil xa ti imei, xa reitinen teni di e ut nesao. Ve rin ak, hisit sanien eo xil xa di lasa ni e huram xil vus lasakras lapol ni ngan xil xa ba labe visal Hi mei lamal tevi pe meten.

<sup>2</sup> Vengan, vahit ngan xil xa di lamot mi Hi lamese tevi ra tesaen nae xil vahe reitin, linalonge

---

✧ 9:27: Sen 3:19 ✧ 9:28: Hib 10:10; Aes 53:12; 1Pit 2:24; Plp 3:20; 2Tim 4:8

ti mun nasa ve tesaen nae xil e linasa ti mun sanien eo xil nava mini.

<sup>3</sup> E sanien eo xil xa di lasa ni e huram xil vus di lasak ni moletin xil di lanem xati xa tesaen nae xil di tamu.

<sup>4</sup> Mak iaxa vengam xa re buluk e re nani lasakras laleh rerat tesaen xil ra moletin xil. ✧

<sup>5</sup> Misak ni, melele xa Kristo temei e ut etan, xi tehiteni mi Tamen tehiti,  
*“Sanien eo xil del holesok xil xa ladin xil bat minuk iem ti tavei.*

*E otesa tenbeok minou tangan nimei e nimot minuk itela.*

<sup>6</sup> *Otnavasi xouk ti melele xa di ladin hisi e von sanien eo, mu labas vongoro xil tangan vaserev rin nae pe metom.*

<sup>7</sup> *E inou natehiteni minuk natehit, ‘Inou xiak.*

*O Hi, namei tangan napol vahusil nenemien nam,*

*vaxoni ngan xa latetisi di e Vanuvei Eo usil inou.’ ”*

*(Sam 40:6-8)*

<sup>8</sup> E sepinien xil ak, Kristo tehiteni tehiti, *“Sanien xil del holesok xil xa ladin xil bat minuk iem ti tavei ... Otnavasi xouk ti melele xa di ladin hisi e von sanien eo, mu labas vongoro xil tangan vaserev rin nae pe metom.”* E holesok xil ak labe naha xa rae na Hi tetiamu tesemae ni tangan lisa ni mini. ✧

<sup>9</sup> Bus di, Iesu tehiteni mun tehiti, *“Inou xiak. O Hi, namei tangan napol vahusil nenemien nam.”* Mak, ma melele xa Iesu tesa xi tasen, texoni ngan xa teling sanien eo xil tetiamu tehe rin, e tesa xoteh meulien nan tehe sanien eo te vehakut tangan vahur xoles sanien eo xil xa tetiamu xiak. ✧

---

✧ **10:4:** Lev 16:15,21; Hib 9:13   ✧ **10:8:** Sam 40:6   ✧ **10:9:** Sam 40:7

10 Reitin, vengan xa Iesu Kristo tepol tehusil nenemien na Hi, melele xa tesa tasen ni tenben mini, sanien eo nan tesak ni xir mei ramese ra tesaen nar. E sanien tei takes nan e rin na moletin xil vus pipin te melengien xil ngasen. ☆

11 E rin te polien nae, pris xil vus lapol ni polien nae e melengien xil ngasen. E di lasa mah ni hisit sanien eo xil vehakut e melengien xil ngasen xa misakras valeh rerat tesaen xil. ☆

12 E rin na Kristo, xi tesa sanien eo tei takes nan xa pipin tangan valeh rerat moletin xil vus ra tesaen nae xil te melengien xil vus. E melele xa tesa ni tevus, *“xi dotan de ri metu na Hi.”* (Sam 110:1) ☆

13 E xi da tamu e rute ak *“ituxoh melele xa Hi iling elu nan xil liti pe hen.”* (Sam 110:1)

14 Vengan xa, tetel sanien eo tei takes, xi tepol ni ngan xil xa lamese ra tesaen nae xil mei lamal tevi pe met Hi vehakut.

15 E Ninin Eo mun tesa sepinien xa di pisen ni xa ngan ak be reitin. Vengan tetiamu, tehiteni tehit,

16 *“Hitxatien te xeih hu xa nipol ni itel moletin navan xil e melele nen ak imak:*

*Inou, Iahova, niling rae navan xil liti e tinexil, e nitis xati iti e nenemien nae.”* (Ser 31:33) ☆

17 Di, tehiteni mun tehit,

*“Reitin, ninanem ti mun usil tesaen nae xil, mu holesok xil xa tamal ti xa teha xat rin nae.”* (Ser 31:34) ☆

---

☆ **10:10:** Hib 9:12,28 ☆ **10:11:** Eks 29:38 ☆ **10:12:** Mat 22:44; Mak 16:19; Pol 2:34; Efes 1:20; Hib 1:3; 8:1; 12:2 ☆ **10:16:** Hib 8:10  
 ☆ **10:17:** Hib 8:12

18 Ma, melele xa Hi di miketeh bos rilomun mi moletin xil ngamu, linasa ti mun sanien eo xil ve tesaen nae xil.

*Ve sanien eo xa Iesu tesa ni, rakila rave sangas visal Hi*

19 Mak ma tuxoli e hinoxoli xil, vengan xa re Iesu tepol ni suse ve xir ngamu, ulixir nakan ti tangan rave sangas visal Hi e rute xa be eo xa be eo pupu. ✧

20 Vengan melele xa Iesu temaen xoteh tenben e temat, kaliko xa lalihi tangan vasikoe xol moletin xil linava ti sangas visal Hi temesel tehe rin lu e tesah suse temese ve xir.

21 E xosali, Iesu mei be vatixar na pris xil e Nim Eo na Hi e di misoh ve rin nar.

22 Mak, ma rimei sangas visal Hi itel meulien xil xa memese e neketen xa be reitin. Melele xa ramei visali, rakila xa nggoni ngan xa Iesu tevuil ni ren xat xir e tesak ni meulien nar mei temese ra nenemien tesa xil, e tetel oei xa mexal e temese tevi, xi tekas moten tenbexir. ✧

23 Mak, ma nenemien nar ita kat, e ti rital xat neketen nar ixeih xa di rabit rati xa di raling nenesien nar da en. Ripol ni imak vengan xa rakila ranesi e Hi xa di pol sen hitxatien nan xil.

✧

24 E bos xa rinem usil suse xa rikila ritutou ni xir tangan eheien nar iti e xir e ripol ni sexien hos xil.

25 Rinastokovein sexien te vitueien ti naxoni ngan xa rut moletin xil di lapol ni. E ti risel xat xir ihe holu mak mu, vengan di rapusi xa melengien te mei rilomunen na Suv di bemei sangas mu.

---

✧ 10:19: Hib 4:16 ✧ 10:22: Esek 36:25; Efes 5:26 ✧ 10:23: Hib 4:14

<sup>26</sup> Reitin, rixuxou kuhi vengan xosxa rakil reitinen usil Iesu Kristo ngamu, e di tamu rapol ni tesaen, ma sanien eo tovuol mun tangan vasak ni xir ramese rilomun ra tesaen nar xil. ☆

<sup>27</sup> Misak ni, momal tang xa ngan xil xa langgulehi di lapol ni tesaen ulixil ikan ihe holu melele xa di ladatil melengien xa Hi ilepis rin nae e ikin pangasien mi xil ihit lihe Upang xa misakras vamat xa ia len elu nan xil. ☆

<sup>28</sup> Be reitin xa melele xa moletin tei nggur xoteh rae xil na Mosis e “*moletin lu mu tol latbit rati latbit be reitin,*” (Dut 17:6) ☆ linapisen esaeen ti mini, e likin maten vari mini.

<sup>29</sup> Vengan ngan ak be reitin, munem usil naha xa mei istal e moletin xa mikil reitinen usil Kristo, e nggulehi dit pol ni tesaen. Moletin ak di pisen ni xa xi di misin Nat Hi. Xi di mike neta sav tang e re Iesu, ngan xa tesak ni hitxatien te xeih hu na Hi mei be reitin, e xa tesak ni moletin ak mei memese pe met Hi. E xi di misepin misa ba xat Ninin Eo xa di pisen eheien hos mini. Mak, ma be reitin xa naha xa mei istal mi hisit moletin xa mak isa xa isa pupu. ☆

<sup>30</sup> Ngan ak be reitin, vengan rakila xa Hi iaxa tehiteni tehit, “*Inou, Iahova vari, nabiteni xa nisa xoles neta xa xil latepol ni. Reitin, inou nisak ni xil lia huit sexien tesa nae xil.*” (Dut 32:35) ☆ e tehiteni mun tehit, “*Iahova iaxa ilepis rin na moletin nan xil.*” (Dut 32:36) ☆

<sup>31</sup> Ma, rixuxou kuhi vengan xosxa rihe hisit moletin xil xa imak, ma isa xa isa pupu mi xir e

---

☆ **10:26:** Hib 6:4-8    ☆ **10:27:** Aes 26:11    ☆ **10:28:** Dut 19:15  
 ☆ **10:29:** Eks 24:8; Hib 13:20    ☆ **10:30:** Rom 12:19    ☆ **10:30:**  
 Sam 135:14

melele xa rihe he Hi xa meul.

<sup>32</sup> Mak, ma munem rilomun ni sexien xil namim xa tetiamu, melele xa mule kil miehen na Hi. Munem rilomun ni xa tetep iaxa mutekameti tex-eih ve melele te xeih xil xa mutehisu ni, xa mutehuri tetel nenemien xa tehe teviei.

<sup>33</sup> Melele xil holu moletin tesa xil latesepin tesa teha xat xamim e latesak purun xamim pe met moletin xil. E ulimim tenakan ti tangan mumos vatel ngan xil xa di langgur hisit sakpurunien xil xa mak. ☆

<sup>34</sup> Tetiamu, esaeen namim teti e ngan xil xa lateti e nim te xeih. E melele xa moletin xil latesa pangasien mi xamim vengan taxa mube Kristin xil e mei lateleh vuol ni holesok namim xil, xamim mutemaen kuhi mi xil tang tetel sien. Mutemaen ni vengan xa mutekila xa holesok namim xil te neketen iti vehakut e ihos xa ihos mak mu ili holesok xil xa lateleh rerati.

<sup>35</sup> Mak, ma xosali, ulimim nakan ti, vengan xa be reitin xa huit neketen xa muhuri ihos mak mu.

<sup>36</sup> Musak ni nenemien namim ihe teviei tangan mukila mupol ni neta xa Hi ien bei. Vengan xosxa imak, ma muhur xat naha xa xi tehit xati. ☆

<sup>37</sup> Ngan ak nggoni ngan xa Vanuvei Eo di biteni xa bit,

*“Nave nousav ti,*

*ngan xa di bemei imei ihe reitin e nararu ti.*

<sup>38</sup> *E ngan xa di nggusil Hi del neketen nan, xi momal pe meten.*

*E Hi tavesi xi ti ve moletin xa di biles rilomun ra neketen nan ve ulikanen.” (Hab 2:3-4) ☆*

---

☆ **10:33:** 1Kor 4:9 ☆ **10:36:** Luk 21:19; Hib 6:12 ☆ **10:38:** Aes 26:20; Rom 1:17; Kal 3:11

<sup>39</sup> E xir ratave moletin xil xa ti raviles rilomun ra neketen nar ve ulikanen, e ti rakesae ven. !E-e! Xir rabe ngan xil xa di rasoh nggeih e neketen nar e Hi di misa meulien sal mi xir.

## 11

*Tetep iaxa Hi tepol texo moletin xil tetiamu xa neketen nae teta*

<sup>1</sup> Neketen nar di e melele xa rakil kuhi xa ti ripus huite te naha xa raling nenesien nar en, xa rake reitin e holesok xil xa rasakras rapusi.

<sup>2</sup> Vanuvei Eo tesepin tehos usil avu nar xil tetiamu ve neketen xa latehuri.

<sup>3</sup> Vengan xa nggo neketen iaxa di ranem kila xa Hi tepeas ni ut etan tetel sepinien nan kestang. Ma, holesok xil vus xa di rapusi, Hi tepeas rohon ni texo holesok xil xa rasakras rapusi. ☆

<sup>4</sup> Vengan xa Ebel, neketen nan teta, xi tesa sanien eo tei mi Hi xa tehos mak mu teli sanien eo xa Ken tesa ni. Melele xa Hi tepus kil neketen nan, tehesi xi ven e tehesi xi ve sanien eo nan mun. Tesak ni, Vanuvei Eo tehiteni xa Ebel temat pe meten. E, neta sav xa Ebel temat, neketen xa tepisen ni di pispisi mi xir xosali. ☆

<sup>5</sup> Vengan xa Inok, neketen nan teta, xi tenamat ti. Hi tetal rati tehe ut nesao e moletin tovuol vakila vakameti mun. Vanuvei Eo tehiteni xa Hi tehesi xi ve Inok, e tehur rati tehe ut nesao. ☆

<sup>6</sup> E rakila xa moletin tovuol mikila vasak ni Hi vahesi xi ven xosxa neketen nan tovuol. Vengan xa ngan xil vus xa di lamei visal Hi lineket mu xa

---

☆ **11:3:** Sen 1:1; Sam 33:6,9; 2Pit 3:5; Rom 4:17 ☆ **11:4:** Sen 4:3-10

☆ **11:5:** Sen 5:24

xi da e di misa huite mi ngan xil xa iexil bei tangan lamei visali.

<sup>7</sup> Vengan xa Noah, neketen nan teta, xi telong xat Hi melele xa tesel xati usil holesok xil xa isa xa imei xa xi tenapus ti mu. E vengan xa Noah temerere ni Hi, xi tepol ni tuturil tei xa mahulong tangan vateh meulien e ngenen xil. E tuturil ak tehe simeleleen tei mi mosav xil tangan vapisen ni mi xil xa momal tangan xi vasa pangasien mi xil ve longrasien nae. Tesak ni, Hi tepusi xa Noah temal pe meten vengan xa, neketen nan teta. ✧

<sup>8</sup> Vengan xa Ebrahim, neketen nan teta, xi telong xat Hi e melele xa tekesi tangan ihe kantri tei xa tehit xati tehit isa ni mini. E neta sav xa takil ti rute xave xa di teha en, Ebrahim testokovein kantri nan xati e teha. ✧

<sup>9</sup> E vengan xa, neketen nan teta, melele taxa tetuxoh kantri xa Hi tehit xati mini, Ebrahim teta en texoni ngan halesav tei. Reitin, xi tetel ngenen xil lateti e nim tavolin xil tang, texoni ngan xa Aesak xal Siekob mun lutepol ni xa lutestal texo vatimol nan tetutou. E hisit hitxatien xa Hi tesa ni mi Ebrahim teha tetuxoh xalu mun del vatimol nalu xil. ✧

<sup>10</sup> Ebrahim teta texoni ngan halesav temak venggan xa teling nenemien nan tangan vatatil taon xa mahulong xa de ut nesao. Ngan ak be taon xa Hi vari teling xati e tekili ni tehusil nenemien nan, taon tei xa ita vehakut.

<sup>11</sup> Vengan xa Ebrahim, neketen nan teta, Hi tesak ni mei tehe tata tei, neta sav xa tehe momatu kuhi ngamu e Serah tehe lumalum. Hi tepol ni

---

✧ **11:7:** Sen 6:13-22; 7:1; 1Pit 3:20; Rom 3:22; 4:13; 9:30 ✧ **11:8:** Sen 12:1-5; Pol 7:2-4 ✧ **11:9:** Sen 23:4; 26:3; 35:12,27



temak vengan xa Ebrahim tenesi xa Hi ipol sen holesok xil xa tehit xati mini. ☆

<sup>12</sup> Tesak ni, rapusi xa, neta sav xa Ebrahim tehe momatu xa tehe momatu pupu e sangas vamat, ☆  
Hi tesak ni *“ngan xil xa listal lixo en lihe holu xa lihe holu pupu lixoni hitu xil te tilang hat mu lixoni suvien xil te tas xa moletin misakras vavuli sen ni.”*  
(Sen 22:17) ☆

<sup>13</sup> Melele xa Ebrahim, Aesak xatel Siekob latte-  
lele, neketen natel e hitxatien na Hi texeih tamu,  
neta sav xa latnaleh ti mu naha xa Hi tehit xati  
mi xatel. Texoni ngan xa latteketeh tehe sotin e  
lattelonge tehos pupu ven. Tesak ni, tetel sien,  
lattehit rati xa lattehe ngan halesav xatel xa tan  
natel xati e ut etan tovuol. ☆

<sup>14</sup> E rakila xa ngan xil xa di lasepin mak di lalang  
ves kantri tei xa mei ihe nae xati.

<sup>15</sup> Xatel ak latnanem ti mun usil kantri xa  
latestokovein ni. Vengan xa vahit latotit ni ngan  
xa ti latonem usili, ma latkila latotilomun latoha  
en.

<sup>16</sup> E eheien natel teti e kantri tei xa ihos mak  
mu, kantri xa de ut nesao. Misak ni, vengan xa  
neketen natel texeih en, Hi tave unoun ti tengen  
moletin xil lakesi ni Hi natel. Vengan xa be reitin  
xa tesak mesen taon xa mahulong tei e ut nesao  
tengen latiti en. ☆

<sup>17</sup> Vengan xa Ebrahim, neketen nan teta, melele  
xa Hi tehit vapus kil reitinen te neketen nan, xi  
temaen xoteh meulien na natneli xa tehe Aesak

---

☆ **11:11:** Sen 17:19; 18:11-14 ☆ **11:12:** Rom 4:19 ☆ **11:12:** Sen 15:5-6; 32:12; Eks 32:13; Dut 1:10; 10:22 ☆ **11:13:** Sen 23:4; 47:9; 1Kron 29:15; Sam 39:12; 1Pit 2:11 ☆ **11:16:** Eks 3:6,15; 4:5; Mak 12:26

tengan mei vahe sanien eo tei mini. Reitin, Ebrahim tevue xat xi tangan vahas vin natneli xati xa tehe tei takes nan mei vahe sanien eo tei mi Hi, neta sav xa Hi tehiti xati xa isa tuxolxatien mini ixo en. ✧

<sup>18</sup> Ebrahim teneket en vengan xa Hi tese pin mini usil natneli ak tehiti, “*Vatimol xil xa natehiti xati minuk, xil mei listal lixo Aesak.*” (Sen 21:12) ✧

<sup>19</sup> E Ebrahim telong xati vengan xa tenemi xa Hi ikila ital rat Aesak ra maten. E, e rin tei, rakila raviteni xa tehe reitin xa Ebrahim tehur rilomun ni Aesak ra maten.

<sup>20</sup> Vengan xa Aesak, neketen nan teta, melele xa mei tematu kuhi, tesis Hi tangan ituxol xat Siekob xal Esao e melengien xil xa ti imei e meulien nalu. ✧

<sup>21</sup> Vengan xa Siekob, neketen nan teta, melele xa sangas vamat, tesis Hi tangan ituxol xat kekes ni nat Siosepe xalu. ✧ Di, “*Siekob tesuv xat xi ni eitingil nan e tepet rat his Hi.*” (Sen 47:31)

<sup>22</sup> Vengan xa Siosepe, neketen nan teta, melele xa sangas vamat, tesepe usil melele xa Hi isak ni mol-Isrel xil limea lihe reling kantri te hal Isip. E vengan xa teneket xa ngan ak mei istal ihe reitin, ma tesa sepinien mi xil usil naha xa ti lipol ni ni tiei nan melele xa liha.\* ✧

<sup>23</sup> Vengan xa tame Mosis xal ninen, neketen nalu teti, melele xa Mosis tepot, lutesoso ni aveti tol (3) vengan xa lutepusi xa tuvava ak tehos xa

---

✧ **11:17:** Sen 22:1-10; Tem 2:21 ✧ **11:18:** Rom 9:7 ✧ **11:20:** Sen 27:27-29,39-40 ✧ **11:21:** Sen 48:15-16 \* **11:22:** Siosepe tesis xil tangan lileh tiei nan e melele xa listokovein kantri te hal Isip e litilomun lihe tan xa Hi tehiti xati mi xil (Sen 50:25-26). ✧ **11:22:** Sen 50:24-25; Eks 13:19

tehos pupu. Ve neketen nalu, ulixalu tenakan ti tangan lalolong ras rae na suv toto te hal Isip. ✧

<sup>24</sup> Vengan xa Mosis, neketen nan teta, melele xa temeul tehe eilep, tesin ni tangan latekesi ni nat atuli na suv toto te hal Isip. ✧

<sup>25</sup> E teling nenemien nan xa ihos mak mu xa ihur longpangasien itel moletin xil na Hi ili ngan xa itit ni tesaen xa di misak ni moletin xil lalonge bos tave hi ti.

<sup>26</sup> Xi tepusi xa longpangasien xa di tehuri venggan di teling neketen nan e Mesaea xa Hi tehit isa ni imei ihos mak mu ili holesok hos xil xa teti e Isip. Tenemi temak venggan xa teketehe tehe sotin tetuxoh huit neketen xa Hi isa ni mini.

<sup>27</sup> Vengan xa Mosis, neketen nan teta, testokovein kantri te hal Isip e ulin tenakan ni ti ekaten na suv toto teni. Mosis teling nenemien nan texeih xa ixulehi ihusil Hi venggan texoni ngan taxa tepusi di tetiamu ni teha, ngan xa moletin ti misakras vapusi. ✧

<sup>28</sup> Vengan xa Mosis, neketen nan teta, telong xat rae Hi e tepispisi mi mol-Isrel xil ni sexien xa ti lipol ni Anien te Tavien ixo en e itep iaxa ti likas pos te puiteh mae xil ni ra. Isak ni, melele xa masxaxa tei mei ihas vin muimol xil vus xa latehe malohos, navas vin muimol xil na mol-Isrel xil ti. ✧

<sup>29</sup> Vengan xa mol-Isrel xil, neketen nae teta, latehur xoteh Tas te Pili e tan xa tevue. E melele xa mol-Isip xil latesak pisi tangan lapol ni, Hi tepol ni tas mei tekutaxol xil, e xil vus latemerir e latelel. ✧

---

✧ **11:23:** Eks 2:2; 1:22 ✧ **11:24:** Eks 2:10-12 ✧ **11:27:** Eks 2:15; 12:51 ✧ **11:28:** Eks 12:21-30 ✧ **11:29:** Eks 14:21-31

30 Vengan xa mol-Isrel, neketen nae teta, latekakaolatekapis taon te hal Seriko tehe valu e he sav (7), e vloh xa mahulong te taon ak tekiri lel.  
 ✧

31 Vengan xa Rehab, neketen nan teta, xi xa tehe atou tei te suse tehur pilei moletin xalu te luvoluven na mol-Isrel xil e tetutou ni xalu. Misak ni, xi tenamat ti vatel ngan xil xa latelong ras rae Hi.  
 ✧

32 Nakila masepin usil moletin sav xil holu, e melele nen ak tapin ti tangan masepin usil neketen na Kideon ✧ e Barak, ✧ neketen na Samson e Seftah, neketen na Deved e Samuel, e neketen na provet xil mun.  
 ✧

33 E vengan xa neketen nae teta, lateha tan ni suv toto te kantri sav xil, ✧ latelaxat kuh moletin xil texo sexien xa temal, ✧ latehur huit hitxatien xil na Hi, latepus Hi teki xol vulonge laeon xil, ✧

34 latehas upang tei xa mahulong temat, ✧ latelesae ra tiei te vaeen, tenbexil temerou, e mei latexeih rilomun, latepol ni holesok xil xa tellep e vaeen xil, e latehol rerat ngan xil xa di latevae ve rin na kantri sav xil lateha.

35 Vengan xa mama xil latehur neketen, xil latehur rilomun ni horamue nae xil xa latemea rilomun ra maten. ✧ E mama sav xil, horamue nae xil latehas vin xil vengan xa latesin ni tangan ha lameluv. Latemaen ni tangan ha lalél e he mosav

---

✧ **11:30:** Sos 6:12-21    ✧ **11:31:** Sos 2:11-12; 6:21-25; Tem 2:25

✧ **11:32:** Sats 13:2    ✧ **11:32:** Sats 4:6    ✧ **11:32:** Sats 4:6

✧ **11:33:** 1Saml 17:34-36    ✧ **11:33:** Sats 15:20    ✧ **11:33:** Dan

6:1-27    ✧ **11:34:** Dan 3:23-25    ✧ **11:35:** 1King 17:17-24; 2King

4:25-37

xil tangan, itutou sung, likila lihur meulien tei xa ihos mak mu e melele xa limea rilomun ra maten.†

<sup>36</sup> Moletin sav xil, latepol pepamen mi xil, late-meas pangas xil ni ao xa tekan, lateso xil latehe nim te xeih, e lateling sen e xil. ✧

<sup>37</sup> E moletin tesav xil mun, latehov vin xil, lateta xoteh xil latehe rin lu, e latesal vin xil ni tiei te vaeen. Xil holu, moletin xil latesak purun xil e latepol ni tesa mi xil. Holesok nae xil latehe tovuol e latesing ni hilbe sipsip mu nani xil tang. ✧

<sup>38</sup> Ngan xil ak latekakao e uruvuol e rute xa vathu xil lateti en, e lateti e vangihat xil e vul xil tang. Hisit moletin xil ak latehos mak mu pe met Hi, e ut etan tapin ti tangan xil liti en.

<sup>39</sup> Vengan xa neketen nae teta, Vanuvei Eo tesepin tehos usil moletin xil vus ak. E, e meulien nae, xil latnahur sen holesok xil ti xa Hi tehit xati mi xil.

<sup>40</sup> Vengan xa Hi teling xati xa huite te naha xa tehit xati mi xil mei imal tevi ixo naha ti ipol ni e meulien nar e melele xa rituxoh hoxalit lohen te neketen nar.

## 12

---

† **11:35:** Sepinien ak di bit usil mama tei e 170 BC, huram xil tetiamu ni poten na Iesu, xa tepus natneli lu e he sav (7) xa latehur longpangasien xil te xeih e he kavmen te hal Kris xa tehiteni mi xil xa likila ha limeluv xosxa listokovein neketen nae e Hi. E melele xa latesin ni tangan lapol ni, latehu vin xil kekes pe met mama nae. E melele xa horam maxoe xil ak latelel, xil vus latehit rati xa lateling nenesien nae e Hi xa isak ni xil limea rilomun ra maten. Di, latehas vin mama nae mun (2 Maccabees 7:1-41). ✧ **11:36:** 1King 22:26-27; 2Kron 18:25-26; Ser 20:2; 37:15; 38:6 ✧ **11:37:** 2Kron 24:21

*Ripol ni sexien nar mei ixoni sexien na Iesu Kristo*

<sup>1</sup> Moletin xil ak latepisen ni xa neketen nae tete Hi. E nggoni ngan xa xil di lakapis xol xir e di lapet rat nenemien nar tangan ti riloh kuhi e lohen te neketen nar. Misak ni, e hisit sexien xa moletin te lohen di mistokovein holesok xil vus xa meas xat xi, momal tangan xir ristokovein neta xil vus xa di meas xat xir e tesaen xil xa di bil xat xir. Ti, riloh ixehi e lohen xa Hi teling xir en itel nenemien xa rituxoh hoxalite teni. ✧

<sup>2</sup> Riling metexir e Iesu xa teha tetiamu ni xir e suse te neketen, e tesak ni mei ramal tevi pe met Hi nggo neketen nar. E vengan xa Iesu tepus kil sien xa ihuri itutou, xi tehur nenemien xa tehe teviei e temaen tasen ni xi e teha temat e eivave. Xi tenave unoun ti tangan vahur hisit maten xa vamak xa be na moletin tesa xil. Misak ni, melele xa temat, Hi tepet rati e temaen ni tetotan e von merereen e rin matu te von xeihen nan. ✧

<sup>3</sup> Iesu tehur sakpurunien xil holu texo he ngan xil xa lapol ni tesaen, e tehuri tetel nenemien xa tehe teviei. Misak ni, melele xa xamim mulonge misa, munem usil xi tangan nenemien namim namot ti e munastokovein neketen namim ti.

<sup>4</sup> Melele xa di musak del tesaen xil te ut etan ak, munem xati xa remim tenaleh ti mu e mutnamat ti mu ven.

<sup>5</sup> E iemim nabong ni ti selxatien xa teha mi xamim vengan xa mube horamue xil na Hi xa tehit,

---

✧ **12:1:** 1Kor 9:24 ✧ **12:2:** Sam 110:1; Mat 22:44; Mak 16:19; Pol 2:34; Efes 1:20; Hib 1:3; 8:1; 10:12

*“Horamue navan, uteong kuhi e melele xa Iahova di momal ni xouk ve neta ngan, e nenemien nam namot ti e melele xa di misa pangasien minuk.*

*<sup>6</sup> Upol ni imak, vengan xa Iahova di momal ni ngan xil xa eheien nan di e xil e di misa pangasien mi ngan xil xa teleh rerat xil mei labe nan xati.” (Pro 3:11-12)\**

<sup>7</sup> Melele xa di mubisu ni longpangasien xil, muhuri itel nenemien xa ihe teviei ixoni ngan xa be Hi iaxa di momal ni xamim. E munalonge ti nasa vengan xa Hi di pol ni mi xamim nggoni ngan xa mube horamue nan xati. Vengan xa horamue tovuol xa tamen di tamal ni ti. ✧

<sup>8</sup> E vahit Hi namal ni xamim ti naxoni ngan xa di pol ni mi horamue nan xil vus, ma vapisen ni xa di pol ni mi xamim naxoni ngan xa mube horamue xil te suse e mutave horamue nan xil xati ti.

<sup>9</sup> Melele xa tamexir te ut etan di lamal ni xir, ramerere ni xil. Mak, ma momal mak mu tangan riling nenemien nar ihe tan tangan rihusil nenemien na Tamexir xa de ut nesao tangan rihur meulien sal. ✧

<sup>10</sup> Tamexir te ut etan di lamal ni xir be tamure tang nggusil naha xa momal e nenemien nae. E Hi, xi di momal ni xir tangan vatutou ni xir tangan vasak ni xir mei rave eo vaxoni ngan xa xi be eo.

<sup>11</sup> Melele xa lamal ni xir ve neta ngan, ratamaal ti ven. Reitin, di misak ni xir ralonge misa ven. E dutou ni sung, melele xa lapispisi mi xir ni naha xa momal nggo en, di rapus huite teni xa di mistal e meulien nar xa be tomat e momalen. ✧

✧ **12:6:** Rev 3:19    ✧ **12:7:** Dut 8:5; 2Saml 7:14    ✧ **12:9:** Nam 16:22; 27:16    ✧ **12:11:** Tem 3:17-18

<sup>12</sup> Ve rin ak, “*musak ni hemim mei ixeih tangan ipol e lemim mei ixeih tangan musomal.*” (*Aes 35:3*)

<sup>13</sup> E “*muxuxou kuhi xa kakaoen namim imal,*” (*Pro 4:26*) tangan ngan xil xa di langgusil xamim xa lamerou mu lasakras lakakao kuhi e neketen nae, xil linasavut ti e linamot. Ihos mak mu xa mututou ni xil mei lixeih pilei mu.

*Selxatien tangan rinasin eheien hos ti xa Hi di pisen ni mi xir*

<sup>14</sup> Musak pisi tangan muti e tomat itel moletin xil vus, e musak pisi tangan kakaoen namim ihe eo. Mupol ni imak vengan xa ngan xil xa latave eo ti lasakras lapus Hi Suv. ☆

<sup>15</sup> Muxuxou kuhi tangan munahiles tinemim ra Hi xa tehur pilei xamim ve eheien hos nan. Vengan isa xosxa mupol ni imak, ma nenemien tesa namim naat purun xamim ti mun tang naxoni hing xa di nggat purun xuxus ni vatiei savsav xil. ☆

<sup>16</sup> Muxuxou kuhi tangan ti e xamim napat vituei natel hanusav tei xa tenateli ti tetela, e nanem male ni holesok xil na Hi tenaxoni ngan xa Esao tepol ni. Vengan xa xi tepos ni von muimol nan ve pelet te anien tei takes. ☆

<sup>17</sup> E xamim mukila xa, tetutou sung, Esao ien tehei tangan vahur tuxolxatien na muimol xil, e tamen tesin ni. E neta sav xa tetang ven, tepusi xa mesal tovuol mun tangan vahiles naha xa tepol ni ngamu. ☆

---

☆ **12:14:** Sam 34:14; Rom 12:18    ☆ **12:15:** Dut 29:17    ☆ **12:16:** Sen 25:29-34    ☆ **12:17:** Sen 27:30-40



<sup>18</sup> Xamim mutamei ti visal Vathu Senae vaxoni ngan xa mol-Isrel xil tetiamu latepol ni. Mutnamei ti e rute xa mukila mupusi e mutuxoli. Mutnapus ti upang xa mahulong xa tepili, momah xa maluxoluk xa di tetuvan, e votiang xa temu texeih. ✧

<sup>19</sup> Xamim mutnalong ti amaru xa tesel texeih xa texeih, e rae Hi xa tesak ni ngan xil xa latelonge, ulixil tekan pupu e latetakesi tangan nasepin ti mun imal ni xil.

<sup>20</sup> Ulixil tekan temak melele xa lateteong ni rae na Hi xa tehiti, *“Xosxa neta tei imei sangas ituxoh vathu ak, ma muhov vini, neta sav xos be moletin mu vongoro tei.”* (Eks 19:12-13)

<sup>21</sup> Reitin, melele xa Mosis tepusi, len mun temalili e tehiti, *“Leok di malili e uluk di mikan holu.”* (Dut 9:19)

<sup>22</sup> E xamim mutamei ti sangas ni vathu tei te ulikanen xa temak. E xamim mumei visal Vathu Saeon te ut nesao, taon te hal Serusalem na Hi xa di meul vehakut xa vehakut tang. Mumei visal masxaxa nan xil xa labe holu xa labe holu pupu xa di lamei vituei tangan lapet rat hisen itel sien.

✧

<sup>23</sup> Mumei tangan mutit vituei itel horamue sav xil na Hi xa di langgur tuxolxatien holu nggoni ngan xa labe muimol nan xil, ngan xil xa latetis xat hisexil tete vanuvei na Hi e ut nesao. Xamim mumei visal Hi xa di milepis rin na moletin xil vus. E mumei e rute xa ninin na ngan xil xa lamal tevi pe met Hi ladi en. ✧

---

✧ **12:18:** Eks 19:16-22; 20:18-21; Dut 4:11-12; 5:22-27; Eks 19:12-13; Dut 9:19 ✧ **12:22:** Kal 4:26; Rev 21:2; 5:11 ✧ **12:23:** Luk 10:20; Sen 18:25; Sam 50:6

24 E mumei visal Iesu xa di pol pe met Hi ve rin na moletin xil nggusil hitxatien te xeih hu nan.✧ Re Iesu di misis Hi tangan iketeh ihos e xir. Ma, re Iesu bos mak mu mili re Ebel, xa tesis Hi tangan vasa halesil tei.✧

25 Misak ni, muxuxou kuhi tangan munasin ti ngan xa di misepin mi xamim. Munem xati xa mol-Isrel xil xa latesin selxatien na Hi e ut etan, latnalesae ti ra ekaten nan. ?Vengan xa ngan ak be reitin, xamim xa di musin rae Hi xa di misepin mi xamim nggo ut nesao ti mulesae ra ni itep? ! Musakras vari! ✧

26 E melele xa Hi tesepin texo Vathu Senae, raen tesak ni tan temulul texeih.✧ E xosali, xi tehit xati tuei tehit, *“Nisak ni rute xil vus te ut etan imulul vatei mun, e nave ut etan ti kestang, ut nesao mun imulul.”* (Hag 2:6)

27 Sepinien xa bit, *“vatei mun”* di bit kila xa holesok xil vus xa Hi tepeas ni, xi ilul ni e ileh rerati ihe rin e ha ikesae vari. Isak ni, holesok xil kestang xa lasakras lamulul liti nga.

28 Lelaxatien na Hi misakras vamulul. E vengan xa di misa rat lelaxatien nan ak mi xir, momal tevi tangan rimesi ihe holu xa ihe holu mak mu e rimot mini itel merereen e ulikanen.

29 Rimot mini imak vengan xa xeihen na Hi nar nggoni upang tei xa mikila vaa len holesok xil vus.✧

## 13

---

✧ **12:24:** Sen 12:2-4; Hib 7:22; 8:6; 9:15; 1Pit 1:2 ✧ **12:24:** Sen 4:10 ✧ **12:25:** Hib 2:1-3; 10:28-29 ✧ **12:26:** Eks 19:18; Sats 5:4; Sam 68:8 ✧ **12:29:** Dut 4:24; 9:3; Aes 33:14

*Selxatien tangan ripol ni sexien xil xa imal pe met Hi*

<sup>1</sup> Momal tangan xamim Kristin xil muxulehi tangan ti iemim ihei xamim mun tang.

<sup>2</sup> Iemim nabong ni ti tangan ti muhur pilei ngan xil e tim samim xa labe ngan halesav. Munem xati xa rut moletin xil xa latepol ni, latakil ti xa di latehur pilei masxaxa xil. ✧

<sup>3</sup> Iemim nabong ni ti tangan ti musa tutouen mi ngan xil xa ladi e nim te xeih. Mupol ni ixoni ngan xa xamim mun mudi e nim te xeih itel xil. Iemim nabong ni ti tangan ti mututou ni ngan xil xa di langgur longpangasien xil holu nggo he mosav xil. Mupol ni ixoni ngan xa xamim mun di munggur longpangasien xil ak. ✧

<sup>4</sup> Xamim vus mumerere ni tetelien, e tiramue xal atou xa luteli lalihe reitin ve xalu kestang. Mupol ni imak vengan xa Hi ilepis rin na tiramue mu atou xa miteli ngamu e ba pat vituei del hanusav tei. E ilepis rin na ngan mun xa ba pat vituei del hanusav tei e melele xa lutateli ti mu. ✧

<sup>5</sup> Mupol ni meulien namim imeluv ra eheien te mani. Mulonge ihos tang e naha xa mungguri. Vengan xa Hi tehiteni tehit,

*“Ninastokovein xamim ti e ninasin xamim ti.” (Dut 31:6) ✧*

<sup>6</sup> Ma, risoh ixeh e rihit,  
*“Iahova vari di dutou ni nou, misak ni uluk nakan ti.  
 ?Vengan xosxa imak, visi vari mikila vapol ni neta vaha xat inou? Moletin tovuol.” (Sam 118:6)*

---

✧ **13:2:** Sen 18:1-8; 19:1-3 ✧ **13:3:** Mat 25:36; Hib 10:34 ✧ **13:4:** Kal 5:19,21; Efes 5:5 ✧ **13:5:** Sen 28:15; Dut 31:8; Sos 1:5

<sup>7</sup> Munem xat vat xil xa latetel rohon ni xamim e neketen namim, xa latesa longeongen hos na Hi mi xamim. Munem rilomun ni usil sexien te kakaoen nae e melele xa latemeul tamu lateti, e tetep iaxa latemat, e mutepol texoni xil tang. ✧

<sup>8</sup> Iesu Kristo dat mak tang tetiamu, xosali, e vehakut tang, nahiles ti.

<sup>9</sup> Munamaen pispisien savsav xil ti xa latave reitin ti tangan linatel xamim muhe reling suse na Hi xa momal. Ma ihos xa nenemien namim ixeh vengang xa mukil eheien hos xa Hi di pisen ni mi xamim. Munanem ti xa mumal pe meten vengang xa di mulong xat rae xil te anienen. Vengang xa hisit rae xil ak usil anien lasakras latutou ni ngan xil xa di langgusili. ✧

<sup>10</sup> E rin nar, Iesu temat texoni sanien eo tei xa lalingi de hor te sanien eo. E pris xil xa di lapol e Nim Tavolin xa langgulehi dit langgusil sexien matu na Siu xil, sanien eo ak na Iesu natutou ni xil ti.

<sup>11</sup> Tetiamu, melele xa vatixar na pris xil na Siu xil latehas buluk mu nani tei, teserev kuh re vongoro ak tehe pesin tei tangan vahuri vahe visal Hi tangan xi vakas moten meten ra tesaen na moletin xil. Melele xa tepol ni tevus, pris sav xil latepo rat tiei teni tehe reling rute xa moletin xil lateti en, e latesupang e upang tea len ni vari tang. ✧

<sup>12</sup> Misak ni, Iesu mun tehur longpangasien xil e temat e hale te taon tangan, tetel ren xati, mikila vasak ni moletin nan xil mei lamese pe met Hi ve tesaen nae xil.

---

✧ 13:7: 1Kor 4:16; Hib 6:12    ✧ 13:9: Efes 4:14    ✧ 13:11: Lev 16:27

13 Misak ni, rinave unoun ti tangan rave reling rute xa moletin nar xil ladi en\* tangan rave visal Iesu xa di rabisti vituei dela e ti rihur hisit long-pangasien xil ixoni ngan xa xi tehuri. ✧

14 Vengan xa, e ut etan ak, taon tovuol xa mikila vata vehakut. E di ralang ni taon tei xa ti mei. ✧

15 Misak ni, ve naha xa Iesu tepol ni e rin nar, vehakut ti risa memesien mi Hi ixoni sanien eo nar mini. E rihit rati xa Iesu be Suv nar e di raling neketen nar en. ✧

16 E iemim nabong ni ti tangan mupol ihos mi mosav xil e mututou ni xil itel naha xa di e hemim tangan mupol ni, vengan xa Hi besi xi ve sexien xil ak. ✧

17 Mulong xat vat namim xil te neketen e muhasil sepinien nae xil. Vengan xa xil di laketeh xol meulien e neketen namim. E melengien tei, xil lisoh pe met Hi tangan lihit rilomun ni sepinien mini ihusil polien xa xi telingi tete hexil. Mulong xat xil tangan likila lipol itel sien, e natel nenemien ti xa nasa, vengan nenemien tesa xa mak misakras vatutou ni xamim. ✧

18 Musis li e rin namem vengan xa di mapol ni holesok xil vus del nenemien xa memese tevi, e di masak tangan sexien namem mi mosav xil momal e melengien xil vus. ✧

19 E nadakes xamim mak mu tangan musis mi Hi xa itemanon ipol ni suse tangan nikila nitilomun

---

\* **13:13:** Ngan ak di misep usil sanien eo xil del sexien sav xil na Siu xil xa tateh meulien e moletin xil ti vengan xa Iesu Kristo keatang iaxa be suse teteh meulien en. ✧ **13:13:** Hib 11:26 ✧ **13:14:** Hib 11:10,16; 12:22 ✧ **13:15:** 2Kron 29:31; Sam 50:14,23; Hos 14:2 ✧ **13:16:** Plp 4:18 ✧ **13:17:** Aes 62:6; Esek 3:17 ✧ **13:18:** Pol 24:16; 2Kor 1:12

nihat ve xamim nave nousav ti.

*Sisen kor*

<sup>20</sup> Hi be vatit tomat e xi tetal rat Iesu, Suv nar, ra maten. Iesu nggoni moletin te lelatxatien xa eilep na sipsip san xil. E Hi tesak ni hitxatien te xeih nan mei tehe reitin e ita vehakut texo re Iesu. ☆

<sup>21</sup> Misak ni, nasis tangan Hi ipol sen holesok xil xa ihos e meulien namim tangan mukila mupol sen naha xa xi ien bei xamim tangan mupol ni e ihesi xi ihe holu ve xamim. Ipol ni holesok xil ak ixo Iesu Kristo xa momal tangan risa memesien e merereen iha mini vehakut xa vehakut tang. Reitin.

*Sepinien kor*

<sup>22</sup> Nadakes xamim, tuxoli e hinoxoli xil, tangan mulong kuh selxatien navan xil ak, vengan xa sepinien xil xa di nadisi xiak bat mi xamim tave teviei pupu ti.

<sup>23</sup> Ieok bei tangan xamim mukila xa tua nar Timoti ba ven mase ra nim te xeih ngamu. E xosxa imei itemanon, ma nihuri itel inou e melele xa nihat nisao ni xamim.

<sup>24</sup> Musa 'bos makoe' navan iha mi vat namim xil vus e mi moletin xil vus na Hi mun. Tuemim xil te neketen xa ladi e kantri te hal Itali di lasa 'bos makoe' nae bat mi xamim.

<sup>25</sup> Di nasis tangan eheien hos na Hi iti mi xamim vus.

---

☆ **13:20:** Aes 63:11; 1Pit 2:25; Sak 9:11; Aes 55:3; Ser 32:40; Esek 37:26

**Vanuvei Eo e sepinien Vatlongos na  
mol-Vatimol xil niutestamen e rute te  
oltestamen**  
**Portions of the Holy Bible in the Southeast Ambrym  
Language of Vanuatu**  
**Des portions de la Sainte Bible dans le Sud-Est  
Ambrym Langue de Vanuatu**

copyright © 2015 Wycliffe Bible Translators, Inc.

Language: Southeast Ambrym (Ambrym, Southeast)

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-06

---

PDF generated using Haiola and XeLaTeX on 18 Apr 2025 from source files dated 31 Aug 2023

d6322831-f65b-57c1-8673-8099ea7771d7